

晚晴籀詩匯



晚晴笈詩匯卷一百八十四目錄

閨秀

王靜淑 五首

王端淑 十二首

徐安吉 四首

馬氏 一首

徐昭華 四首

顧妣 二首

林以甯 十六首

毛媿 四首

錢鳳綸 二首

馮嫺 四首

吳綃 七首

柳是 七首

顧橫波 三首

董白 二首

周炤 三首

吳芳華 一首

葉子眉 一首

王素音 三首

呼祖 二首

林瑛佩 四首

郝湘娥 三首

李氏 四首

明所乘言區矣一百一四目金

胡瑗 三首

周淑履 五首

毛秀惠 四首

胡禱桃 一首

竇氏 三首

色他哈 二首

孫淑 一首

周巽 一首

周氏 一首

何氏 一首

聶含玉 二首

韓氏 一首

王飛瓊 一首

王氏 一首

姚履敬 五首

孔麗貞 三首

孔淑成 一首

孔昭蕙 一首

孔傳蓮 二首

孔繼坤 三首

孔繼孟 二首

孔素瑛 二首

孔繼瑛 二首

孔蘭英 二首

顏氏 二首

丁氏 一首

許權 四首

章有湘 十九首

章有渭 五首

范姝 一首

暉冰 二首

龔靜照 四首

浦映綠 三首

謝瑛 一首

徐氏 一首

彭氏 五首

徐元象 一首

姜桂 一首

梁頤 二首

張柔嘉 二首

程瓊 七首

李文慧 二首

陳靜淵 一首

張貞 一首

劉若蕙 一首

李氏 一首

霍雙 二首

范貞儀 三首

此詩余言... 卷一... 一... 金... 二...

謝秀孫 二首

林氏 四首

陳瑞麟 一首

黃幼藻 四首

黃幼繁 一首

李氏 三首

楊淑貞 四首

曹炯 三首

龍氏 一首

韓韞玉 一首

錢紉蕙 五首

陳秀貞 五首

楊素書 一首

潘孟齊 一首

陳克毅 一首

徐珠淵 四首

張昊 二首

張昂 一首

邵笠 一首

鄧繁禎 一首

吳彩霞 一首

張繁 八首

顧英 一首

張令儀 十七首

張若燭 一首

張似誼 二首

宋素梅 二首

莊德芬 四十六首

蔣季錫 四首

鍾合嘉 十二首

陸鳳池 二首

陳氏 一首

曹錫珪 二首

曹錫淑 二首

曹蔚文 二首

宋景衛 二首

方京 三首

楊珊珊 一首

吳受竹 十首

杭澄 三首

高氏 一首

張佛繡 十二首

姚允迪 九首

郭步韞 十四首

鮑之蘭 二首

鮑之蕙 三首

鮑之芬 三首

雷氏 二首

李學溫 五首

李學慎 十首

劉氏 一首

金順 三首

杭溫如 二首

陳結璘 一首

曹文 一首

吳文 十首

吳京 三首

曹文 二首

曹文 二首

曹文 二首

曹文 四首

宋文 二首

宋文 一首

李學慎 十首

金順 三首

陳結璘 一首

曹文 一首

吳文 三首

吳京 一首

曹文 二首

曹文 二首

曹文 一首

曹文 十一首

宋文 四十六首

宋文 二首



晚晴簃詩匯卷一百八十四

閨秀

徐世昌

王靜淑字玉隱號隱禪子浙江山陰人思任長女陳樹

勲室有清涼集青藤書屋集

詩話玉隱早寡詩才與妹玉映相伯仲名爲玉映所掩

初夏偕玉映妹游山

欲覓清幽處山高恐不深  
閒雲飛別岫野鳥定花陰  
筍嫩留饑採茶香待渴吟  
深閨無限意觸景破愁心

秋日菴居

空齋渡深夜高卧一牀秋  
苔老渾無色溪清淺欲流  
塵隨紅葉掃心付嬾雲收  
蕭瑟聞征雁空歸萬籟休

贈鄰姬

梅影疎窗瘦衾稠薄又寒侍兒不解意指月上闌干

九日遲玉映妹不至

細雨淒風阻雁行竹籬茅舍薄羅裳登樓嬾看黃花瘦山

老林紅一夜霜

柳

乳燕黃鶯三月時春風拂地柳垂垂長條不繫行人住猶

向江南送別離

王端淑字玉映別號映然子浙江山陰人思任女諸生

丁肇聖室有玉映堂集吟紅集

詩話玉映長於讀史工詩善書能對客揮毫兼繪花草有疎落蒼秀之致父季重常曰身有入男不易一女毛西河選浙江閩秀詩獨遺玉映玉映寄西河詩云王媵未必無顏色怎奈毛君筆下何輒有名媛文釋詩緯歷代帝王后妃古今年號名史愚行世

蓬門

骨傲豈隨俗甯攀山鬼鄰舒雲聊作帳集葉戲爲茵鳳嶺  
知難效鹿門且耐貧殘篇任意讀不羨騎麟麟

明妃夢回漢宮次浮翠軒吳夫人韻

一自明妝出未央空留遺恨在昭陽琵琶曲盡關山淚環  
珮聲歸塞上霜宿雁殘更移曉幕依人落月下空牀舊時  
縱有三秋怨不及穹窿此夜長

爲龔汝黃題黃皆令畫

孤亭秋樹色卽是雲深處寫此數峯青倒逐扁舟去

宮怨

長門春鎖月溶溶繡柱金鋪翠自封忽聽馬蹏驚欲曙多  
年不候景陽鐘

代外贈別毛大可

西冷月落板橋霜  
衰柳長隄祇自傷  
幾日窮愁兼別怨  
一帆秋色帶斜陽  
浮雲影逐離亭路  
歸雁聲淒碧草塘  
學採芙蓉江上去  
黯然回首恨茫茫

病中喜新月

促織頻催懶寒衣  
猶未成起牀  
忘骨瘦著履  
覺身輕  
青帝飄飄散姮娥  
冉冉情秋懷  
無所處  
共月結新盟

自貧病有感

纔已行貧運  
偏增新病魔  
燈花虛擬結  
鵲語幾番訛  
鍼指能生睡  
詩篇強自哦  
寒風吹瘦骨  
酌茗亦陽和

代睿子懷玉尺弟

凋殘花萼失芳叢  
嗟爾天涯我孰同  
鴻雁序離悲夜月  
鶴

鷓鴣詩就泣東風  
縈牽夢隔西江  
杳淪落音難越  
水通景物觸懷思  
切切何時攜手  
歎飄蓬

鄰婦

鳥聲初囀墮花春  
靜女幽妝采落蘋  
臉映芙蓉嬌且豔  
眉修清月淡無塵  
一泓秋水留西子  
半幅輕綃寫洛神  
秀色共餐飢可樂  
不才忝已在東鄰

雨中桃花

寒風微透入淒清  
過雨天桃色易傾  
鶯溼羽衣憐豔冶  
苔傷花影譜心旌  
飛煙乍掩爐峯失  
新草萎殘曲徑焚  
拾得落雲天已暮  
遠林遙聽墮春聲

吳巖子徵和起句原韻

榻占西湖第一樓  
垂簾落影咽雲流  
含香燕入歌聲裏  
避

聯珠詩話卷一 下 八十一  
三  
月花飛點案頭驚嶺青來描錦字蒹葭碧處繫春舟阮公  
清嘯江生筆贏得輕煙紙上幽

長隄梅格漸生香疊入奚童舊錦囊離緒征帆寒雁遠移  
文秀筆淡山光花含碧玉裁清珮雲映芝眉翦綠裳解得  
苑鶯調柳色束紅凝目望華章

徐安吉字子貞上虞人王鼎室

雜詩

浮生甯有涯性靈不可天適自理晨妝遙見東方曉初風  
半吹竹寂寂聞嘯鳥地僻我亦閒日對南山小

山中詠

老楓俯大谿數枝浮水面清風與之俱吹落秋紅片落日  
危孤峯柴門雀喧轉短草動夕陽寒塘石清淺

古意

柳色欲輕黃  
朱樓人自傷  
愁來無洛浦  
夢去有高唐  
寶鏡空懸架  
榴裙驗取箱  
誰書桐葉字  
墳草變鴛鴦

春詞

西樓殘月子規情  
幾樹梨花照水橫  
自抱琵琶廊下坐  
含愁撥得兩三聲

馬氏字靜音會稽人

生烜兒誌喜

良辰屈指及秋元  
喜見明珠耀小軒  
今日人皆稱似祖  
他年汝莫媿爲孫  
秋風丹桂非無種  
福地仙桃信有源  
竚看綵衣娛白髮  
禎祥重與細評論

徐昭華字伊璧上虞人咸清女諸生駱加采室有徐都

講詩集

詩話仲山與毛西河游會西河過其家傳是齋座客方滿伊壁出謁西河命賦畫蝶詩信口立成一座大驚其母與女兄越中稱伯仲商夫人俱以能詩名伯商夫人有女湘君繼起而伊壁名更著甚一時有都講之目陳迦陵序其集云問其桑梓干秋西子之鄉詢彼絲蘿四傑駱丞之婿

桃葉渡歌

可憐桃葉渡落日行人暮雙槳打清波春風緩送桃葉過  
祇今桃葉渡頭稀艇子江頭歸不歸

因探親吳門同虞夫人游虎邱

閩門日出晴鴉噪兩槳閒尋虎邱道宿霧猶含隄上花流  
雲已渡波間藻紅欄上下傍水行畫船歌吹來傾城迴帆  
不盡摻擷意轉慢時聞過曲聲斜峙山橋甫能住香車早  
趁山塘去滿街梔子未開花幾樹垂楊自飛絮到門知是



梵王宮臺榭連雲曲徑通  
棕棚覆葉沾茶碧漆柱遮油賣  
杏紅我尋生公舊法席褰裳一上生  
公石龍剽絕壁尙留池虎去中林  
杳無跡登山四望更無山但見山  
藏古寺閒繞地松楸看去密空庭  
塔影落來圓修廊詰曲幾回度又  
聽歸鴉噪前路夕陽一片寺門邊  
不識眞娘在何處

塞上曲

朔風吹雪滿刀鐔萬里從戎何日還  
誰念沙場征戰苦將軍今又度陰山  
長雲衰草雁行平砂磧征人向月明  
思婦不知秋夜冷寒衣還未寄邊城

顧奴字啟姬錢塘人諸生鄂曾室有靜御堂集翠園集

詩話啟姬工詩並精音律與柴季嫺林亞清錢雲儀  
馮又令張槎雲毛安芳稱蕉園七子結社聯吟詩會

合刻其在京時有花憐昨夜雨茶憶故山泉之句都  
人傳誦宋牧仲贈鄂友輿詩有云閨中有良友茶憶  
故山泉似此驚人句難爲贈婦篇啟姬代幼輿  
爲蟹字韻詩又所製詞曲佳句漁洋甚賞之

毛安芳輓歌

憶昔當春時壽君慚不文未幾聞君喪奄忽如流雲流雲  
過眼空悲怨大火西流時倏變玉樓金屋網蠅蛸西風葉  
落空深院淒涼寶瑟掩餘音慘淡菱花冷釵鈿尙憶當年  
對鏡人鏡中鸞死悲嬌面織錦詩成那得聞墨池寒浸琉  
璃片不知何處弔君魂草白燐青望中見

題林亞清畫

梅花竹葉互交加濡墨淋漓整復斜憶得昨宵明月下橫  
拖疎影上窗紗

林以甯字亞清錢塘人御史錢肇修室有墨莊詩鈔鳳

簫樓集

詩話亞清少受母教喜學經義工詩文旁及繪事以畫梅竹著爲蕉園七子之秀從宦唱酬流傳佳句人之豔稱

憶父禹都

曉登百尺樓遙望中條山天際有白雲日夕自往還去來何寥邈引領難追攀誰云生女好少長違親顏豈不眷庭闈安能事閒關問寢久疎闊視膳良以艱回步循南陔躑躅淚汎瀾

畫竹

新竹出短籬亭亭如織翠明月升東軒竹影宛在地銅硯磨松煤濡毫寫其意清幽固可嘉愛此堅貞志

柴季嫺索詩賦答

春風吹暝杏花香試拂鸞箋寫斷腸每見遠山思黛色時  
從落月想容光別來幾度梅如雪愁緒縈懷鬢欲霜爲報  
故人休索句硯田慙我已全荒

夢游桃花源

理棹石瀨口洞壑極深窅白日翳層壁倏然露林杪初行  
不見人仄徑礙飛鳥忽逢林木盡水竹四環繞茅屋三兩  
間雞聲出林表主人聞客來攬衣起相勞筍蕨爲我設秬  
梁供我飽白鶴翔天風游魚戲清沼宛若素所歷竭來胡  
不早悵惘塵世事朗徹愜懷抱高邱誰沈淪阿閣孰傾倒  
魏晉不復知以下更何道歎息武陵人悠悠竟終老

贈宛瓊女史

月中仙人結璘子銀海回風漾空翠廣寒青桂生紫芽水

蟾蝕作鴛鴦字清光獨夜照三吳采香涇畔多名姝日射  
簾旌金鵲尾春窗睡足紅氍毹蜀紙新裁鸞鳳帖同心重  
綰菖蒲葉玉寒手擘荔枝漿鎧紅酒暈芙蓉頰風剪春英  
碎粉霞幻作衣間雙蛺蝶綠雲髮鬢黃金璫方空半臂凝  
脂香瑤島承恩夕宴罷寒星亂落參差光

獨夜吟

蕉心未展桐花老春社纔臨燕聲小屋角陰雲凍天色雨  
腳斜侵砌草織暮寒壓夢夢不成耳邊哀角嗚嗚幽房  
鬼逼蘭缸凝牀頭玉盞敲紅冰斫桂燒雲老不死夜烏呢  
殺曉烏起獨繭抽絲結繡襦儂心未卜郎心似開簾蠟樹  
煙依微海燕賓鴻相背飛孤吟起坐各無賴昨夜鄰家夫  
婿歸

錢塘觀潮

氣以三秋肅江因九折名海門環鳳闕斗曜拱神京舟楫  
三都會魚鹽百貨盈涼飈隨艤發新月傍船行共指潮生  
候爭看霧氣橫篙師屏息待漁子放舟迎海外千山合江  
邊萬谷鳴蜃樓驚變幻鮫室忽晶瑩魚沫翻珠珮腥涎噴  
水精玉山高作壘雪浪儼如城似有馮夷鼓長驅掉尾鯨  
前茅從赤鯉後隊亦青旌自可吞溟渤何煩洗甲兵蛟宮  
圖廣袤蟻垤敢爭衡久欲尋天漢頻思訪玉清乘槎常不  
達浮海竟無成近覩三江險方知六字平奇觀書短韻尺  
幅海濤生

秋蟬

昨夜涼風屆節初園亭景物漸蕭疎高枝墜露堪承飲深

樹微雲可卜居秦女支礎秋半急衛娘小鬢夜來梳遐情  
自足傳霄漢不逐金梧下玉除

秋暮讌集願圃分韻

早起登臨玉露灑畫樓高處碧雲涼池邊野鳥嗁寒雨籬  
外黃花媚曉妝斜倚紅闌同照影閒揮綠綺坐焚香溯洄  
他日重相訪一片蒹葭秋水長

寄啟姬雲閒

柳上浮家小結廬水軒竹檻稱幽居問人新借簪花帖教  
婢閒鈔相鶴書蠅子避潮緣硯席蠓奴沿月上階除清閨  
事事堪題詠刻玉鏤冰恐不如

渡伊洛合流

歷盡山川險方知行路難寒風鳴大谷怪石激流湍歧路

心常怯窮途淚未乾波光應笑我獨自上河干

哭柴季嫺

婆娑壁間畫手澤猶芳鮮清夜發光芒睨視不敢前想見  
落筆時氣足而神全非徒貌幽花自寫翠袖翩每思棄塵  
務從君事丹鉛豈期不我顧倏忽長相捐一慟雲爲愁梁  
月藏嬋娟

穀雨

鏡臺流影射窗紗風到簷前柳腳斜竹架整書除脈望春  
池洗硯亂蘋花桑濃蠶子猶懸箔日暝蜂王早放衙童子  
佩壺尋澗水滌甌明日試新茶

草草深閨度歲華生平不解問桑麻沿籬野豆初牽蔓繞  
砌山桃半欲花細雨漬成楊柳色暝風催放牡丹芽村姬



結束新螺髻傍曉比鄰喚採茶

得夫子書

經年別思多得書纔尺幅為愛意纏綿挑鐙百回讀

初春

百合名香手自焚雪晴天際尙停雲寒梅才被東風圻釀

得春愁已十分

毛媿字安芳錢塘人先舒女徐鄴室有靜好集

詩話安芳有至性母病割股者三夫疾篤又割臂和藥以進刻苦吟詩積稟盈帙時年逾三十未有子嘗執其詩卷曰此我之神明所寄即我子也歿年四十終無子其夫亦能詩為刊遺集

小春

小春人更倦坐覺微寒侵衰草已失綠紅梅綴疎林沈水焚欲盡薄酒還自斟筒內翰細筆壁閒靜瑤琴古人於此

時凝神以正襟誰知深閨裏亦惕堅冰心

雪

天涯一望茫茫白積玉堆瓊互長陌興來何處子猷船高  
卧誰家袁安宅山中千樹噪飢鴉自掃冰鱗自煮茶不怪  
滿身寒起粟只愁壓折老梅花

西湖

十錦長塘十里開遙看春草綠於苔金鞍狹路爭馳驟畫  
舫晴波自溯洄日映柳梢鶯百轉風吹花氣蝶雙來西湖  
西子曾相喚擬酌芳魂酒一杯

秋夜

漏永銀河影漸低樓頭明月又沈西五更展轉不成寐四  
壁蟲聲幾樣唬

錢鳳綸字雲儀錢塘人進士安侯女諸生黃式序室有

古香樓集

詩話顧和知太夫人以詩名雲儀爲其曾孫婦能嗣家學詩筆高古與所爲文皆可傳

美人梳頭歌

新林一聲嗁綠鳥三十六宮春欲曉  
牀上轆轤牽素綆秋水溶溶鏡光冷  
漸看紅日捲珠簾雙鸞卻有眉纖纖  
玉鳳斜飛鞞金蟬珮環搖搖曳湘煙下  
階獨自摘芳蕊櫻桃笑儂不結子

哭伯兄

在昔黃天傾覆卵無完理兄不卽殉身  
感奮良有以摩挲雙匕首一夕再三起  
千鈞重一發恐復憂天只在苒歲月閒  
隱痛入骨髓未堪讐人胸抱疾忽焉死  
尸牀目不瞑不

繼非人子尚有娥親在李壽汝莫喜

馮嫺字又令錢塘人諸生錢廷枚室有和鳴集湖靈集

詩話又令生長西溪秉氣清淑幼聰穎讀書過目成誦歸錢氏後定省之餘聞房唱和因以名其集

關山月

關山月月如弦離人對此愁不眠關山月月色清此時相望倍含情月黯黯兮心亦苦月溶溶兮淚如雨明月不關人幽懷自難撫君不見故園月影高銜杯讌賞醉清宵新歌妙舞興偏豪每虞風雨來相撓云何對月情轉切終夜徘徊心似結蟾光遠近應相同不忍邊城看圓缺

玉階怨

夕殿沈沈夜偏懸明月光君恩何處空惆悵隱隱星河漏正長清露凝兮玉階靜秋風吹徧羅衣冷寂寞長門思悄

然含情獨對冰簾影

和夫子九日擬登吳山因雨不果原韻

重九宜晴雨聲密相望窗前秋瑟瑟未過小圃訪黃花恐  
負花期被花責芳辰寂寂遣情難倦插茱萸感百端身世  
浮萍空碌碌何如秦女蚤乘鸞憐予夙懷林下志幼對溪  
山願差遂年來四壁聊可棲悠然三徑有餘致瀟瀟風雨  
靜中聽竹影松枝簾外青興到豈知塵內事煙雲間潑墨  
無停

和落葉詩原韻

秋林蕭瑟近寒塘樹樹飄殘葉上霜幾陣因風驚蛺蝶數  
聲和雨醒鴛鴦閒階競落依蛩響遠渚輕飛雜雁行最愛  
深宮流錦字不教紅粉怨昭陽

吳綃字素公一字片霞號冰仙長洲人常熟許瑤室有

嘯雪菴詩鈔

陳迦陵曰虞山許太守夫人吳片霞有詩才其梨花雙蝶一詩世尤誦之詩曰如玉雙雙透瑣幃鏡中斜見粉依稀西施舞罷春衫冷道韞詩成柳絮飛影過杏梁朝日澹夢醒巫峽片雲歸梨花深院無人到不

是開籠

放雪衣

詩話素公工書畫兼擅絲竹其詩清麗婉約集中有與梅村祭酒相倡和者稱祭酒曰兄馮定遠文集中有與高陽夫人論古詩樂府源流即謂素公墓在常熟東門外嘉慶戊辰陳雲伯明府會修之為立短碣

嘯臺

魏晉已如夢荒臺今尙存龍蛇正交鬪鸞鳳已高騫避俗  
惟長嘯逢人常不言始知真隱意何必入桃源

詠古

公子翩翩信絕倫擬將豪舉卻狂秦不知賓客成何事枉

煞樓頭斬美人

楊柳枝詞

宮柳初開一抹眉  
武昌城下乍逢時  
春來樹樹煙條綠  
欲認何枝是舊枝

春游百泉

仲月春始和  
遠郊阡陌靜  
數里聞水聲  
豁然入靈境  
桃李猶含萼  
森肅長楸勁  
淪漣映紅玉  
蘋藻浮青鏡  
太行互天末  
遙瞻似雲靚  
溯流尋神源  
圓折紛珠迸  
喁喁見魚樂  
鱗鬣自適性  
善病久罷歡  
暫使心目瑩  
至哉蘇門人  
今古誰與並

秋意

相如綠綺秋絃急  
霜侵樹影寒  
蛟立塘水冷  
冷湘佩清遙

山翠澹巫娥泣嘖嘖蟲吟四壁空千金賦得長門宮含毫  
思苦朝來渴病骨生春蜀酒濃

春晚曲

棟花風起春如醉海燕勞勞雲碎碎湖頭兩槳白晝閒莫  
愁深下珠簾睡筍生斑玉柳生絲陌上人歸草似煙  
聲促銀牀冷玉井飛紅墮碧泉

銅雀伎

霸業山河在三臺不復春當時望陵處松柏亦成塵舞袖  
閒雲薄紅顏野草新曾聞王子敬道此最關人

柳是初名隱斐字如是小字影憐常熟錢謙益側室

詩話如是事蹟詳見顧苓河東君小傳沈蚪河東君  
記徐芳柳夫人小傳餘如錢氏家變錄安雅堂集嚴  
武伯詩序掃軌閒談三岡識略觚臚諸書語多從同  
王義士虞山柳枝詞似傷忠厚高安朱芷汀孝廉船



有詩云家變獨能持大義虞山身後有家  
姬洵是史筆先後名作如林皆費辭矣

西泠

西泠月照紫蘭叢楊柳絲多待好風  
小苑有香皆冉冉新花無夢不濛濛  
金吹油壁朝來見玉作靈長夜半逢  
一樹紅梨更惆悵分明遮向畫樓中

和汎舟詩韻

秋水春衫憺暮愁船窗笑語近紅樓  
多情落日依蘭櫂無藉輕雲傍綠舟  
月幌歌闌尋塵尾風牀書亂覓搔頭  
五湖煙水長如此願逐鷗夷汎急流

素瑟清尊迴不愁  
梅樓雲物似妝樓  
夫君本自期安槩

有美

詩云迎汝  
雙安槩

賤妾甯辭學泛舟  
燭下烏龍看拂枕  
風前鸚鵡

喚梳頭可憐明月將三五  
度曲吹簫向碧流

題祁幼文寓山草堂

懸圃涼風物外姿  
石樓丹棟總相宜  
家通洛浦招雲接  
人倚湘君放鶴遲  
花滿曉臨珠蓋拂  
鶯嘯春入玉衣吹  
伊余亦有懷園引  
笛裏青霞渺桂旗

春日我聞室作呈外

裁紅暈碧淚漫漫  
南國春來正薄寒  
此去柳花如夢裏  
向來煙月是愁端  
畫堂消息何人曉  
翠帳容顏獨自看  
珍重君家蘭桂室  
東風取次一憑闌

劉夫人移居金陵賦此奉寄

釣魚溪畔賃茅茨  
負戴風流近可追  
雒涘潘安居舊築  
荆州宋玉宅新移  
門前一水如臨鏡  
天外雲山與畫眉  
桃葉渡頭雙槳在  
清溪莫過小姑祠

寒食雨後

紅綃蛺蝶霧事茫茫不信今宵鳳吹長留得春風自憔悴傷  
心人起異垂楊

顧橫波原名媚後以字行一字眉生又字智珠又字眉

莊上元人合肥龔鼎孳側室

陳迦陵曰顧夫人識局明拔尤擅畫蘭蕙  
蕭散樂託畦徑都絕固當是神情所寄

詠醉楊妃菊

一枝籬下晚含香不肯隨時作淡妝自是太真酣宴罷半

偏雲髻學輕狂

舞衣初著紫羅裳別擅風流作豔妝長夜傲霜懸檻畔恍  
疑沈醉倚三郎

海月樓坐雨

香生簾幙雨絲霏黃葉爲鄰暮卷衣粉院藤蘿秋響合朱  
欄楊柳月痕稀寒花晚瘦人相似石磴涼深雁不飛自愛  
中林成小隱松風一榻閉高扉

董白字小宛號青蓮江甯人如皋冒襄側室

陳迦陵曰秦淮董姬才色擅一時後歸如皋冒推官  
明秀溫惠與推官雅相稱居豔月樓集古今閨幃軼

事蒼爲一書名曰奩豔王吏  
部撰朱烏逸史往往津逮之

余澹心曰小宛七八歲時阿母教以書翰輒了了少  
長顧影自憐鍼神曲聖食譜茶經莫不精曉後爲辟  
疆側室事辟疆九年卒年二十七以勞瘁  
死辟疆作影梅菴憶語千四百言哭之

題書悶

獨坐紅窗悶檢書雙眉終日未能舒芳容銷減何人覺空  
費朝朝油壁車

綠窗偶成

病眼看花愁思深幽窗獨坐弄瑤琴黃鸝亦似知人意柳  
外時時送好音

周炤字寶鐙江夏人漢陽李以篤側室

陳迦陵曰寶鐙性敏給知書歸漢陽李生家先有大婦在炤眉黛間有楚色李又愛客游嘗攜炤殘箋數幅以示友人無不色飛者生篋中又藏炤自寫坐月浣花圖雙鬟如霧烘染欲絕圖尾有小傳二一日絡隱或曰炤又字絡隱云

擬古

鴛鴦固友禽鸚鵡亦珍鳥屏欄與池塘哀樂各昏曉鸚鵡  
語鴛鴦飛鳴何繚繞情多恐不祥怨重將毋擾我聞太息  
之衾稠正微渺淒然欲向誰彼姝矜窈窕

次林文貞韻寄王玉映

夫子南歸後永夜述名媛生小貯金屋弱齡弄玉硯海桑

失廬畝竹素易釵鈿感爾瑤華贈時時動紈扇芰荷綴鴛  
翠天真寫素絢詠絮謝女匹織錦蘇娘彥儂是小家女畏  
令仙人見注目倚鏡閣因風寄方便所恃一片心的的託  
澄練

聞外將歸

茶花梅蘂自紛飛小圃身如坐翠微不定陰晴天欲倦何  
方燕雀晚知歸王孫歲歲懷芳草侍女朝朝倚繡幃見說  
畫眉人且近湘山如黛未應稀

吳芳華錢塘人康氏室

詩話芳華適康甫三月從夫避兵天竺旋被掠挾之  
北去題詩旅壁有云後之過此者為妾歸謝康郎當  
索我於白楊青塚間也吳蕊仙和其詩云斷瑟分香  
萬斛愁雲山漠漠水東流邊城夜靜烽煙隔故國風  
生薛荔秋綠鬢朱顏傷寂歷白楊青塚寄  
溫柔於今玉貌知誰賞衰草迷離隔斷溝

逆旅題壁

燕粉香殘可勝愁淡黃衫子謝風流但期死看江南月不  
願生歸塞北秋掩袂自憐鴛夢冷登鞍誰惜楚腰柔曹公  
縱有千金志紅葉何年出御溝

葉子眉揚州人

陳迦陵日辛卯冬宜興史孝廉北上道經淇水夜宿  
宜溝客舍見壁間有數行後云妾廣陵人也從事西  
宮曾不載馬上琵琶逐塵長去愴懷賦此和淚濡  
毫促裝心亂語不成章時庚寅七夕後四日廣陵葉  
子眉識呼主者問之  
知爲宏光西宮也

宜溝店題壁

馬足飛塵到鬢邊傷心羞整舊花鈿回頭難憶宮中事衰  
柳空垂起暮煙

王素音長沙人

詩話素音爲亂兵所掠題詩琉璃河館壁其序有云  
高樓墜紅粉固自慚石崇院內之姝七首耀青霜當  
誓作兀木帳中之婦漁洋有減字木蘭花詞云離愁  
滿眼日落長沙秋色遠湘竹湘花腸斷南雲是妾家  
掩唬空驛魂化杜鵑無氣力  
鄉思難裁楚女樓空楚雁來

琉璃河館題壁

愁中得夢失長途女伴相攜聽鷓鴣  
卻是數聲吹去角醒來依舊酒家胡

朝來馬上淚沾巾薄命輕如一縷塵  
青塚莫生殊域恨明如猶是爲和親

多慧多魔欲問天此身已判入黃泉  
可憐魂魄無歸處應向枝頭化杜鵑

呼祖字文如江夏人邱齊雲室有遙集編

詩話文如嫻詩詞工琴能書善畫  
蘭與姊舉並有才名或譌爲胡姓



聞邱生罷官有寄

有官亦何喜罷官亦何悲一官生罷去是妾嫁君時

題亭中安石榴

安石榴根孤託謝庭合歡枝上日青青懸知雨露深如許結  
子來朝是小星

林瑛佩字懸黎莆田人雲銘女拔貢鄭郊室有林大家

詩鈔

詩話懸黎年十四時西仲觀禍下獄脫簪珥謀贖父  
命匿幼弟萬山中躬任家務藏利刃衣袂間以死自  
誓後適鄭有千里夢隨閩嶠落數行淚趁浙潮生之  
句爲人傳誦其乙丑人日感詠桃花一絕藏橐於繡  
囊歿後其夫檢  
得之謂爲詩讖

冬至夜

愁多已不堪況復逢改序傷心憶舊年鐙下歡相聚今夕

亦如茲痛母歸何處淒淒不敢嘔恐觸嚴君故堂前暗斷  
腸入房淚如雨

登樓寄夫子

憑欄試一望山色入樓蒼野寺藏深樹閒雲度遠岡雨餘  
花故落春盡燕還忙無限登臨思翻成離別傷

九日寄父

強對茱萸只自悲雲天萬疊望中疑閨人不識登高路腸  
斷當年屺岵詩

乙丑人日感詠桃花

瑤池仙子隱眞香愛向春風淺淡妝一種天姿人不識浪  
傳流水引漁郎

郝湘娥保定人同縣寶鴻側室

詩話湘娥姿容娟麗年十一齷於竇氏既長能詩精  
弈又善繪花草人物後竇被誣入獄自經湘娥聞耗  
卽日賦絕命詞縊死於家

江南採蓮曲

采蓮乳婦小花香羅袖新裁半臂長爲羨灘頭交頸睡戲  
將荷葉罩鴛鴦  
十五吳娃慣弄潮隔花回首向郎招來時不用撐船訪門  
對垂楊靠水橋

絕命詞

一婦何曾事二天今朝遄死赴黃泉願爲厲鬼將冤報豈  
向人間化杜鵑

李氏長山人青浦知縣濱女同縣趙伯麟室有梅月樓

草

春閨

重門深鎖寂無塵  
滿樹花開不見人  
獨有畫梁雙燕子  
年年相伴過殘春

清明

又是清明雨後天  
綠楊深處見秋千  
無邊芳草王孫路  
榆莢飛錢柳墮綿

寄外

思君客路冒風霜  
獨上妝樓望帝鄉  
最是離人腸斷處  
長隄衰柳掛斜陽

春望

鳥語綿蠻度短牆  
朝霞催起早梳妝  
自從不上樓頭望  
春色飄零到海棠

胡瑗海陽人鄭於雅室

蘇軾和送別原韻

一別情無限愁心寄晚風羨君佳句好白雪和難工人夢

紅梅

幾回錯認杏花村染得猩紅淺復深不道山香盈小院林

家當日是知音

玉骨冰肌染嫩紅依依低映粉牆東莫教狼藉春泥裏常

伴妝臺鬪曉風

周淑履萊陽人侍衛世祐女膠州高蔭栒室有峽猿草

綠窗小詠

沈歸愚曰婦為相國曾孫女幼工詩于歸後夫婦如師友然蔭栒早歿家盡落母家亦落貧無依藉織紵以生教三子讀書成名下士遠近以女師尊之

詩話周氏世以文章名家故淑履雅能詩既老出峽  
猿草一編授其子消日少時吟紅詠絮可不足錄獨  
此未亡人心血所在不可不令後人知我辛苦耳有  
擬古四首歸愚別裁集錄後二首易題爲述懷末首  
全改今從之

述懷

軋軋機杼聲漠漠空天雪操作入中宵十指皆皴裂積絲  
匹難成不忍中道絕著此縞素裳怡然矢同穴  
孤兒髻鬢年欲令就外傅大者陶性情次亦理章句甯云  
致通顯不敢隕故步爾父有殘書慰母在寒素

秋懷

殘暑方銷歇西風已漸涼高柯憐墜葉疎雨咽寒螿入夢  
新愁積思家舊恨長百年應幾許端的爲誰忙

冬日送別表妹

蕭蕭風雪逼人寒欲整行裝忍淚看珍重送君無別語高堂代我問平安

獨坐思諸弟

含愁寂寂掩柴扉疎柳橫窗映繡幃鴻雁幾行聲噫噫可能一夜向西飛

毛秀惠字山輝太倉人諸生王愨室有女紅餘藝

詩話存素淡於仕進以繪事自娛山輝黽勉同心其林棲之致見諸吟詠

屏水謠

綠楊深沈塘水淺轆轤車聲滿疆畎倒挽河流上隴飛渴鳥銜尾迴環轉今夏旱久農心勞西風刮地黃塵高原田迸裂龜兆坼引水灌之如沃焦男婦足繭更流血鞭牛日夜牛蹠脫田中黃秧料難活村村盡呼力已竭

錢塘懷古

京洛煙塵棄不收  
西湖臺閣作金甌  
流連秋色還春色  
歌詠杭州勝汴州  
自願苟安增幣帛  
誰攄孤憤報仇讐  
棲霞嶺畔將軍墓  
只有南枝記舊邱

乙卯秋外赴金陵省試不售詩以慰之

新妝競埽學輕盈  
俗豔由來易目成  
誰識天寒倚修竹  
亭日暮最孤清

重陽風雨滯幽齋  
失意人難作遣懷  
籬菊已花還覓醉  
便須沽酒拔金釵

胡蓓桃蒙自人履和女

揮珍浦日蓓桃生有異稟  
不食人間煙火工畫山水  
筆墨超逸芳年羽化蒙自地  
處極邊距交趾國僅隔一水  
乃有此雋才仙乎仙乎



題畫

四圍山色翠交加  
竹樹蒙茸一徑斜  
此去仙源知不遠  
前溪流出野桃花

寶氏大名人日巖三女陳元城室有貞奩閣集

賦得愛月夜眠遲

銀蟾喜對宵如晝  
夜涼寂靜三更後  
素魄將移花影斜  
清光已射窗紗透  
斗轉銀河碧漢流  
牡丹帶露弄輕柔  
薰爐香燼渾忘寐  
倚徧欄杆幾曲樓

秋晚

西風吹木葉萬戶動  
寒砧靜院憑欄久  
愁心無限深

立秋

梧飄一葉送秋聲  
風動涼生暑氣清  
萬戶寒砧催木葉  
草

根深處亂蟲鳴

色他哈滿洲旗人

詩話色他哈康熙間杭州駐防旗女子有白曉月者為旗人遙室主人遠戍春間踏青取明萬歷中會稽女子新嘉驛題壁詩半山庵壁上詩曰萬種幽愁訴與誰對人強笑背人悲此詩莫作尋常看一字吟成干淚垂色他哈偶見之誤以為曉月詩和原韻為三絕句曉月重過半山復用前韻續題詩不逮色他哈而以小青自況時人憐之

和白曉月題半山庵壁詩

帳冷衾寒怨阿誰柳煙花雨總成悲怕看春草當窗綠別

後珠簾盡日垂

塞外馬嘶青海月閨中人動白頭悲可憐別後庭前柳一

樣黃昏帶月垂

孫淑字靜谷常熟人諸生許灝室舉人進益母

五日弔古

田文五日生屈原五日亡吉凶同此日理固難推詳原與  
國休戚一死分所當漁父櫂自鼓詹尹龜宜藏抱石投湘  
流心與日月光文從狡兔計高枕樂未央後合魏秦趙伐  
齊何披猖身死薛遂滅高戶仍不祥文生雞狗雄原死蘅  
荃芳世人何夢夢悲屈羨孟嘗我心獨不然臨風慨以慷  
撫時懷往事聊進菖蒲觴

周巽字順吉浙江山陰人諸生沈心室有須曼閣小草  
秋夜聞笛

今夕是何夕忽聽蒼龍吟高樓誰獨倚涼夜有清音窺牖  
月如水隔牆風滿林漏長吹乍斷不盡故鄉心

周氏宜興人同縣華亭教諭任登朝室

過堂伯祖挹齋相國翡翠園

金谷荒涼墓尚存園有許太尉墓午橋風月賸琴尊低徊五十年

前事一樹梨花欲斷魂

何氏德州人故城祕象益諸生象山乾隆己卯舉人訓

導象賢庚寅舉人象英母有厯亭吟藁

春霖

萬井風煙接茂林春雲欲墜掠清潏蕭蕭韻響窗前竹點  
點聲沈石上琴芳草汎池添綠滿落花浮岸帶紅深邨田  
徧處沾時潤喜稱農家望歲心

聶舍玉開原人

詩話舍玉幼字李李客死舍玉聞赴作絕命詞自經以殉

絕命詞

菽水宜將日高堂暮景長  
劬勞羞未報留取待兄行

閨閣耽書史其如大義催  
見危應受命含笑入泉臺

韓氏甯武人

韓珍浦曰甯武地近邊牆風俗質樸求一詩人已不可得氏以閨房之秀刻苦吟詩竟不為習俗所囿真矯矯者

偶興

數日闌珊懶作妝為乘清興弄篇章  
吟成只用畫眉筆信手書題字也香

王飛瓊蒼梧人孟希增室

默坐

默坐閒吟自笑予行年六九樂貧居  
錦機漫織新花樣墨海嘗游小蠹魚  
室有兒孫惟課讀家無儋石亦藏書  
人生

適意爲佳耳過眼繁華總是虛

王氏綏陽人張睿室

詩話王氏幼嫻詩禮年二十嫁未期而夫歿遂以身殉知縣陳詢表其墓曰張烈婦之墓

絕句

自尤妾命薄如箋初賦桃夭失所天未老姑嫜還有託綱常不讓古人先

姚履敬徐州人江甯諸生余其模室平越知縣璜母

詩話姚有賢名鄉里稱爲女道學不以詩重也

寄子璜

夔雨蠻煙寄一官休圖溫飽自求安獨居無愧時加慎持法宜平略尙寬封鮓史傳千古美懸魚人重一身端宦囊莫計輕如葉清白吾家素本寒

擬唐人邊庭四時怨

草滿龍沙綠滿山故園夜夜望刀環漢家雨露無中外春  
色遙應度玉關  
日午中天暑氣多三軍一似火山過縱教汗透重重甲猶  
唱南薰解愠歌  
邊寒畫角咽秋霜辛苦經年戍朔方回想閨中臨別語只  
教努力事戎行  
黃雲圍幕雪如拳敢望生還渡酒泉聞道九重憐將帥貂  
裘昨日賜軍前

孔麗貞字蘊光曲阜人博士毓琹女濟南戴文誥室有

藉蘭閣草

詩話蘊光夫亡守節四十餘年與血緯老人顏氏時  
相唱和其詩草自序謂情隨事遷偶有吟詠無不可

於哀樂  
間分之

哭亡夫

親老妾心悲哭君無盡期月圓分鏡日雨滴斷腸時生死  
魂難聚幽明路已歧縱爲華表鶴留語復誰知

中秋對月

玉宇無塵萬籟幽捲簾一派暮煙浮飛飛歸燕方辭社寂  
寂寒蛩已報秋桂蕊迎風香滿袖桐陰繞座月當樓世情  
爭似清虛好不染人間半點愁

讀玉峯書城葉夫人詩因步其韻

卜宅臨江志自伸柴門常閉不知春汲泉滄茗全拋俗繞  
舍栽蔬未是貧曲徑花鋪鶴夢穩茅齋雨過燕泥新只憐  
落落無儔侶同調難逢我輩人



孔淑成字叔凝曲阜人博士廣胤女有學靜軒草

侍母點消寒圖

堂上傳呼停繡襦  
慈萱看此掌中珠  
鶴眠積雪三三徑  
猩點消寒九九圖  
月影清如今夜好  
梅花香似去年無  
眼前索笑隨暈妹  
博得歡顏韻不孤

孔昭薰字樹香桐鄉人貢生廣南女嘉興朱萬均室其

鎮母有桐華書屋詩鈔

詩話樹香天性孝友秉資嫺雅詩才敏妙措法精絕  
九山秉母教負書名授館職後自京迎養樹香作三  
絕示之有瞻雲且緩思親念好把文章答聖朝及暇  
日鳳池須記取舊打鷗鷺莫相忘之句自以無兄弟  
奉侍父母於家

中秋玩月

今夜團圓月清光萬里同  
恐添慈母思不敢說山東

孔傳蓮桐鄉人奉化訓導毓瓚女宜川縣丞馮錦繼室

御史浩母

詩話桐鄉孔氏系出曲阜傳蓮歸馮數月其夫北上  
謁選旋赴宜川傳蓮居母家之後隨舅江南署中

居七品佐身落萬山中後隨舅江南署中  
晚年以子貴迎養入都所作詩多不存橐

幻夢雜記

金陵藩署舊為明中山王府夢王治獄  
已死婢桐花僕柏婦叩頭請余速歸

忽驚呼嘯出堂皇昏黑中騰引炬光柱國閻羅原一體前

朝甲第大功坊

依依奴婢路歧逢涕泣推扶勸返蹤此處絕無娘姓氏休

教遲及五更鐘

孔繼坤字芳洲桐鄉人嘉興高士敦室有聽竹樓偶吟

詩話芳洲工詩畫其送  
復哉北上詩可見性情

送復哉北上

送復哉北上詩可見性情

珍重復珍重別緒何茫茫臨風理素篋游子整行裝八  
簫五紵愧羔羊春風吹客衣雨雪霏道傍出門幾回  
首一顧一徬徨男兒多意氣安用戀故鄉龜勉事行役弗  
縈兒女腸何以解我憂詩酒恣徜徉何以慰我心德音頻  
寄將白頭有老母黃口多兒郎君職我當代我言君莫忘  
窮冬氣蕭索萬象寒無光豈無三春時燦燦桃李芳願君  
知此意奮志期飛揚不見黃鵠舉千里任翱翔

海棠

真妃夢破曉妝新倦倚東風鬪好春燕子不來天又雨幾  
回愁絕捲簾人

幾枝點染竹籬新一笑風前獨殿春秉燭豈愁花睡去微  
吟還有未眠人

孔繼孟字德隱桐鄉人康熙己丑進士解州知州傳忠

次女烏程夏祖勤室有桂窗小草

詩話德隱讀書明大義侍夫疾徧閱醫家言因通其術夫亡矢志孝事舅姑教子耀曾成立

傷逝

腸斷思君子悲哉逝水流溫文嫺禮樂慷慨熟春秋長嘯  
劉琨壯深心賈誼憂玉樓天帝召寡鵠恨難休

送春

落花無迹怨春歸寂寂空枝舞蝶稀惟有呢喃雙燕子殷  
勤依舊傍簷飛

孔素瑛字玉田桐鄉人諸生毓楷女知縣金尙東室有

飛霞閣詩集

詩話玉田工續山水人物畫輒題詩楷法得晉人筆意有閩中三絕之目

楊九娘廟

楊溪九曲水波平古廟常留孝女名今日桔槔聲不斷花  
蚊無迹柳風清

大開自題畫落花蝴蝶便面

春去春來花自惜花開花落蝶應知年年綠到王孫草正  
是花殘蝶老時

孔繼瑛字瑤圃桐鄉人傳志女諸生沈廷光室河道啟

震母

詩話瑤圃工詩書畫諸姊妹皆能詩而瑤圃詩尤富  
寄外詩石云窗下看兒談魯論鏡前教婢揀吳綿又  
云夜枕先愁明日米朝寒又典過冬衣蓋紀實也後  
啟震應召試賜文綺瑤圃有詩云賜錦初披新樣紫  
遺甌莫忘  
舊時寒

震兒設教永平移家就養途中即事有作

有子悲風木饑驅到北平移家聊遠道就食悵餘生載主  
親封篋棲神宛倚衡同車頻險阻共命判幽明渡水潛相  
喚登山恐或驚崎嶇輪易折轂棘馬難行攬袖看孫哭烹  
茶有婦迎爲言官道折齊說郡侯清地繞岡巒勢人多弦  
誦聲疎花開小院斜日下高城聚似萍波汎來當麥浪晴  
黃泉誰問路白髮獨添莖每憶黔婁被徒憐考叔羹蕭條  
愁客館何日送歸旌

春遊大明湖

大明湖景似蘇隄也向熏風策杖藜歷下亭環流水曲會  
波樓繞遠山齊香飄花浦蓮初放歌入蘆洲舫又迷一抹  
煙雲催夕照回看月掛柳梢西

孔蘭英桐鄉人世球女汪聖清聘室

詩話蘭英工詩書字聖清未婚卒聖清請唁其母  
贈以蘭英遺扇爲所績燕姬出獵圖並題一絕

自題燕姬出獵圖

霜氣冷征衣秋原雉兔肥燕姬年十五挾彈勢如飛

秋懷

紛紛木葉舞迴廊自酌香醪破悶嘗遠道短書勞悵望此  
鄰長笛助悲涼閒愁易亂如衰草女伴難留似夕陽獨有  
寒蟾非世態照人薄醉坐蘭房

顏氏號恤緯老人曲阜人光敏女同縣孔興焯室有恤

緯齋詩

詩話恤緯夫亡絕粒五日所親諭以大義乃強食孝  
事威姑教嗣子及孫皆爲諸生夙工詞翰有晚香堂  
詩後易爲恤緯

哭母

我母辭人世淹忽八閱月卜時清和初歸窆禮罔闕雪涕  
挽靈車腸斷輪不發寡女嗁血盡麻衣慘白髮但恨地下  
土不使肉生骨皎日入西海荒林人影沒

遣病

夢迴芍藥香相續暝風吹雨梅子熟階下石榴駐晚霞繞  
池竹映湘簾綠家貧無力種茯苓病久應知疏骨肉草堂  
泥新絕織塵道書攜就窗中讀

丁氏諸城人鍾大文室

詩話丁氏夫歿以姑疾躬侍湯藥姑愈不  
食死歛時家人於笥中得別父母一詩

別父母絕句

夫死難獨生兒將歸黃土父母鞠育恩請俟來生補

許權字宜娛德化人進士崔謨室有問花樓集



詩話宜煢賦命奇薄以不得於姑自縊死袁簡齋錄其七歲玩月詩及春懷寄外諸作得以流傳

贈外

君子安厥命真人息其機舉世笑君貧君貧不自知天地  
兩大境溫飽與寒飢人不寒飢死定有溫飽時陰陽相倚  
伏此理天不虧痛飲劉伶酒狂吟李白詩終日無塵事春  
風任所之

七夕

七月七之夕家家望女牛神仙不可見涼風何颼颼我疑  
天孫之巧轉近拙東西斷隔難飛越一年一度一分離干  
古銀河響幽咽不須乞巧向天孫若賜巧多愁欲絕君不  
見東家力田婦耕饁常相隨旦暮共苦樂白首不分離又  
不見西鄰有才女夫婿上玉堂終年不相見悵望悲河梁

玉露無聲夜清悄盒中盼斷蛛絲繞不知巧思落誰家只恐巧多人易老寄語人間癡兒女甯爲其拙毋爲巧

玩月

一種月團圓照愁復照歡歡愁兩不著清影上闌干

寄外

柳風梅雨路漫漫身不成飛著翅難除是今宵同入夢夢時權作醒時看

章有湘字玉筐一字令儀號橘隱華亭人明羅源知縣簡次女孫中麟繼室有澄心堂集望雲草再生集

陳迦陵日雲間章玉筐龍眠孫進士婦也工才調常作詩寄姊亦何減唐人韓君平姊瑞雲妹玉璜並擅詩名妹迴瀾掌珠俱以文章顯

晚眺

嶺峻隱青猿松高飛白鶴山雲挂樹梢風捲殘英落新蒲  
已抽芽細草媚崑壑景物最傷心桃李還如昨誰家少女  
郎背立鞦韆索貌態衣不勝歡笑風前樂春來無所爲鬪  
草爭花萼何事深閨人終朝常寂寞

秋日寄家姊俞夫人

八月秋風振山谷黃花初放銀塘菊一枝手折欲贈君遠  
道茫茫愁極目間將玉紙寫新詩新詩賦就動遠思蕭蕭  
鴻雁隨雲度寂寂蚪鐙擁漏遲憶昔同在翠微閣飛文聯  
句誇奇作那知江海各天涯青鳥無情雙寂寞蘇合房中  
愁索居尺素遙傳錦鯉魚爲問江淹五色筆擬成團扇近  
何如

曉思

窗外雞初唱花間露未乾欲臨明鏡照猶怯翠眉寒宿鳥  
翻林樹歸鴻振羽翰不知鄉國信何日報平安

九日雨中有感

每到茱萸節思親淚滿衣難禁心耿耿況對雨霏霏故國  
秋萸老他鄉客夢稀登臨憐弟妹竟作彩雲飛

秋懷

露華寒夜滴柴扉留滯天涯未擬歸吳下雲深鴻雁杳楚  
江秋老鷓鴣飛穿鍼結縷人誰共詠絮吟風事已違聞道  
故園萸菜熟他鄉回首淚霑衣

次玉璜妹來韻

記得西窗翦燭時鴿原回首忽天涯夢魂不覺吳山遠愁  
緒惟應夜月知畫閣焚香春汛汛繡簾飛燕晝遲遲相期

泖水歸甯日重與殷勤話別離

哭夫子

一自公車去不還從今信有望夫山赤繩虛繫三生約紅  
淚惟餘兩袖斑訣絕未親真恨事夢魂時傍見懽顏也知  
修短原無定豈料榮枯頃刻間

千里良緣合倡隨于歸不滿十年期最傷薄命分鴛侶猶  
幸高名占鳳池故國泥封聞信日長安春色看花時無端  
遽赴修文召不管空閨怨別離

日日傷心靜掩門每因春草憶王孫空閨形影那堪問滿  
架圖書今尙存十六年前靈谷夢

夫子讀書靈谷寺夢謁帝有五日進士之語

三千里外杜鵑魂孤燈厭聽梧桐雨偏送愁聲漬淚痕

父子夫妻總幻因

夫子先有鼓盆之感又屢罹西河之痛

夜臺相見可相親

無端生死偏摧我不定功名卻誤人遺得文章驚四海寄

來錦字恰三旬

三月得泥金報四月訃聞矣

待乘雙鳳君先去寂寞蘭

閨未死身

幾度悲秋秋已闌迴紋裁就向誰看錦衾人去鴛鴦冷銀

蒜簾空翡翠寒無復音容還故國空餘旅櫬返長安昨宵

夢裏分明見依舊看花倚畫欄

遙憶牛衣相對悲那堪富貴便分離姓名始入黃金殿麗

藻終傳白雪詞淚灑在原當此日魂歸華表竟何時嬌閨

寂寂腸應斷玉鏡臺空忍畫眉

銀漢霜華下井梧愁心曾耐夜唳烏月移妝閣侵書幌風

動形容出畫圖

夫子臨別以寫照一幅示予

咫尺相看言笑隔依稀偏

怪夢魂無含情獨對芙蓉帳一任香銷金鵲爐

挑盡殘燈淚滿衣空階細雨正霏微愁凝長夜難成寐夢

到相逢不忍歸

夢同夫子至雲間省  
母二人相對泣下

人去依然同色笑覺

來何處覓庭幃悲涼此際還家日楓冷吳江一雁飛

瘦影臨風憶所思冰心裂碎更誰知分棲怕覩連枝樹續

命空傳五色絲閣下招魂憐有弟墓前執紼痛無兒閒來

到處搜遺彙開篋篇篇黃絹辭

蜀魄嗁鴟道路長鶴鴿無復雨連牀中郎事業書千卷子

敬人琴淚幾行不死丹心終化石餘生青鬢總成霜與君

不共齊眉案紙閣蘆簾瘞孟光

閨情

坐對鴛鴦草行看蛺蝶花那知春復夏游子未還家

今日泊舟江上大風有懷

令節初逢起問程  
停燒還喜片帆輕  
旅魂欲到親幃側  
一夜江聲夢不成

家園白牡丹

天風昨夜曳仙裙  
縹緲高臺一段雲  
好共海棠春睡足  
不將濃豔嫁東君

靈章有渭字玉璜  
簡三女嘉定侯泓室  
有淑清遺草

詩話玉璜善詞翰自幼長齋篤信內典于歸後遭世變夫婦遁迹借隱既而仍還故里相保於覆巢破卵之餘至難能也

行園

爛漫花如繡  
閒行碧沼邊  
浴鳧還泛泛  
舞蝶自蹁蹁  
羅袂香風襲  
紗窗翠篠連  
徘徊看落日  
彩霧絢青天

春感

春感



舞蝶莊生夢嘯鷗蜀帝魂紫芝逢勝友芳草想王孫小閣  
聞雞唱閒庭聽鳥喧曉煙迷麥隴香霧鎖柴門魚戲青萍  
動風吹碧葉翻彩毫題玉柱綠蟻引金尊乍摘葳蕤草長  
依翡翠軒避秦無絕境何必問桃源

舟行卽事

曉霧迷離彩鷁輕掉歌徐動見秋晴臨湍鷺子亭亭立夾  
岸蒲花漫漫生遙指小山遮塔影忽經深樹出鐘聲晚涼  
不覺羅衣薄自愛澄河片月明

懷瑞麟姊

一聲嘯鳩覺春闌懷舊離魂不自寬猶憶繡牀人病起殷  
勤頻爲囑加餐

再懷玉筐

臨別殷勤置酒盃西風揮手畫船開春來苦雨音書滯幾  
度聞簫憶鳳臺

范姝字洛仙如皋人有貫月舫集

詩話洛仙九歲以詠新月知名後與名媛周羽步吳蕊仙友善詩筒贈答不絕

聞蟋蟀有感

秋聲聽不得況爾發哀吟游子他鄉淚深聞此夜心已憐  
妝閣靜還慮塞垣深蕭瑟西風緊行看霜雪侵

暉冰字清於陽湖人諸生鍾隆次女毛鴻調室

詩話清於爲南田族會孫女工寫生芊綿蘊藉用粉  
精純迎日光花朵燦灼作已輒題小詩乾隆初尹文  
端公進呈見賞題詩嘉獎與夫毛鴻調居一小樓以  
吟詩作畫老焉子鳳朝鳳梧鳳儀皆習畫孫女周字  
榴林亦能得其傳

題自畫菊

秋花繞砌錦爛斑爲寫秋花獨閉關天欲老時君正少不  
妨霜雨鑄紅顏  
小樓昨夜又西風籬外霜花綻幾叢閒取丹青爲點染倚  
闌清興有誰同

龔靜照字冰輪號鵑紅無錫人廷詳女同縣陳氏室有

永愁人集

鄧孝威曰鵑紅產名閨工詩畫而抱天壤王郎之怨  
故詩多悽斷尤以尊君中翰懷沙之恨每寓詩歌遭  
時輒軻無  
若鵑紅者

落花和韻

已覺煙消暮雨殘洛陽三月倩誰看紅香暝日流雲散青  
塚黃昏泣露寒競逐鈿釵春未減暗窺妝鏡淚初乾恩  
何似休歸去回首連天紅雨漫

贈周寶鐙

藥房新詠氣如芬  
柳絮名高自不羣  
握管獨吟詩博士  
畫眉爭識女參軍  
嬌藏金屋音猶遠  
步出香塵意轉殷  
祇爲天涯消息杳  
幾番愁摺石榴裙

七夕大雨

天也憐人負此辰  
雨沈河影浸雲茵  
雙星兩地分南北  
烏鵲填橋恐未真

匝歲離多淚已盈  
化爲甘雨溢花茵  
縱生天上猶天忌  
始信人間事有因

浦映綠字湘青無錫人武進黃永室

陳迦陵曰黃比部與夫人浦氏伉儷最篤一日鄒大戲比部曰君得毋昔人所謂愛翫賢妻有終焉之志乎比部曰下官正復賞其名理

謹鵲

片片花飛點繡幃強拈裙帶試腰圍欺人最是檐前鵲說  
道當歸又不歸

呼婢

銀瓶斜插海棠花春色朦朧護絳紗煙裊獸爐香欲燼隔  
簾鸚鵡喚琵琶

牡丹亭

情生情死亦尋常最是無端杜麗娘虧殺臨川點綴好阿  
翁古怪塚荒唐

謝瑛字玉英無錫人徐可先室有壽藤軒集

陳迦陵曰武進徐聲復太守之夫人謝玉英名瑛詩  
名藉甚性簡遠蕭勝不嬰世務太守之官後夫人盡  
斥其橐中數千金買青山莊居之時於橋上憑欄小  
立吟哦竟日其風味如此著有博依小草近留心禪

理並詩亦不多作云

### 送外北上

握手臨行話別時  
叮嚀腸斷淚如絲  
從今憑仗三更夢  
飛繞君前不暫離

### 徐氏長山人繼志女新城耿鳴世室庭柏母

王漁洋曰吾邑耿侍御省亭鳴世妻徐氏都御史華平庭柏之母也有賢行能文章兵後失其集僅傳寄子詩云云有德之言與撚脂弄粉者迥異

### 寄子詩

家內平安報爾知  
田園歲入有餘資  
絲毫不用南中物  
好作清官答聖時

### 彭氏鄧州人而述女李鴻儒室有長林蝶龕諸稟

王漁洋曰宋葉石林先生每晨起集諸女子婦為說春秋近武林黃夫人顧氏若璞好講河渠屯田邊防

晚明詩言 卷一百八十四

三

諸大政子讀其書未嘗不自慚須眉也青立見示蝶  
龕近詩如種桑問織諸篇彷彿幽風遺意而哭母憶  
妹課兒之作尤有河廣載馳風人之志焉因歎禹峯  
先生之教其被於閨閣者如此殆不減石林而夫人  
之才亦詎出黃夫人下耶

課農人種桑示諸婦

種桑令欲稀晨夕風露透抽條葉以繁筠籠日相就繭成  
得收絲織紵不敢後辛苦分所甘寄語諸少婦

拜姑墓

攜有諸孫在嬉聲想共聞未能承婦道徒爾拜姑墳俎豆  
心先潔蘋蘩手自薰悽然松柏下灑淚滿寒雲

謝張夫人寄蘭花香

博山晴結穗雲黃一榻春風入蕙鄉蝶翅初回幽谷夢只  
聞花氣不聞香

課兒輩夜讀

午過涼生暑氣回半擎燈火竹簾開窗前莫厭參丸苦日  
後甘從此處來

謝張夫人寄芽茶

半爐松火汲清泉淨洗砂鑄手自煎度得銀餅香欲透一  
甌先供繡幢前

徐元象字奇孺廣濟人張楚偉室

王漁洋曰奇孺詩文有雋才其京口寄父書云兒自  
襁褓未離掌膝江頭道別意緒淒然舟行風水便利  
遂達京口江南佳麗過眼成塵廣谷大川靡能記憶  
舅氏出鮑明遠大雷岸與妹書與兒讀之如賦如頌  
篷窗瑣瑣恨不能竟所思官舍清華几案如滌挑鐙  
夜坐日起奉甘旨晨昏戀切切耳阿母阿翁無恙四  
時之序成功者退山林觴詠幽情  
暢遂何必紆拖青紫乃稱貴乎

送外



送君入楚江悠悠歸路長一去隔千里魂夢伴瀟湘

姜桂字芳垂一字士霜號古研道人萊陽人明行人塚

曾女孫本渭季女張氏聘室

詩話芳垂未婚夫卒矢志守貞善畫山水乾筆疎秀  
自題小幅并記云仿元人惜筆法惟舊紙得墨始有  
氣韻佳紙難覓大幅更罕茲幀細潔又平拓者再而  
紙性狻難融化淺深濃淡頗費經營而筆不達意欲  
貌似古人而不可得多媿閨秀尹瓊華題姜貞女畫  
詩云空閨工六法取勢入微茫野渡漲秋水遠山明  
夕陽古心無麗藻澹墨有冰  
霜不點雙飛鳥圖中斷頰頰

題畫

暝風晴日值良辰窗外梅花數點新更想林泉清淑致山  
光樹色寫初春

梁頥字秀中號袖石道人安邱人同縣韓朋桓室

詩話秀中能詩早卒  
見古夫于亭雜錄

山村夜坐

俯仰空庭四字清，浮雲掃盡晚煙輕。  
梨花皓月原同色，風竹流泉不辨聲。  
深谷人閒春亦寂，短牆水近冷先生。  
卻思城市喧闐處，簫鼓樓頭聽二更。

答何徵室

時避兵海上

晚羞明月曉羞花，弱質萍飄泛海涯。  
萬疊雲中千里樹，不知何處是吾家。

張柔嘉侯官人惠來知縣應良女中書林佶室

詩話吉人喜蓄善本，書時嗟無力，柔嘉輒脫簪珥以購嘗率二子入都，子侍吉人同纂圖書，集成坐多名士盤餐修潔，人皆賢之。終歲食貧，以詩自遣。晚年五世同堂，壽九十七。

雨夜

支離病榻苦無眠，夜雨鐙昏倍慘然。  
雖有遺書生計薄，淚

痕溼盡枕函邊

遠漏風迴報四更寒秋悶擁對孤檠思量家事方愁絕檐

溜何堪遞楚聲

程瓊字飛仙號轉華一號無涯居士休甯人歙縣吳祚

榮室

詩話轉華幼見董香光書畫眼一編遂能捷悟及長  
書畫算弈靡不精敏論事析理窮極微妙其神解所  
徹視文字象數皆塵秕也生子醇五歲親授以書即  
成誦乃取諸子中精語各附史事以教之醇殤甚痛  
卒

題彭祖張蒼像

苦惜年光戀幻身白頭私擅夢邊春兒家酬酒淒然問可

有齊眉耦齒人

集古今宮闈德容兼備者若干人題其上

豔淑如斯例作塵相逢可卽昔時人願將彼骨吹成土持  
葬兒今屢轉身

釋牡丹亭傳奇色情難壞意

何自有情因色有何緣造色爲情生如環情色成千古豔  
豔熒熒畫不成

有疾豫別玉勾詞客

風流嘉慶古難均共命同心異別親應恨塊泥將打破誰  
能再塑管夫人

卧病坐樂軒

日日薰香禮覺王不任操作不縫裳誰知鹿苑無生訣未  
及龍宮不死方

疾作夢母氏孫淑人挈兒來茲不復夢矣

爲痛甯馨轉自傷相隨卻恨我無娘更誰看等千金重只  
我佳人斷繡腸

屬玉勾生柳外題小眠齋三字

千春萬載此沈埋坐樂軒中只暫挨豈可便無題額處相  
煩親署小眠齋

李文慧字亦士一字端之永城人舉人喬大元室有晚

思小寄吟

揮珍浦日亦士工琴尤好讀史  
嘗手評陳壽三國志具有卓識

夜泊曲江不寐鼓琴

舟泊曲江口孤嶼澹欲失遙岸漁火明煙中棹歌息當此  
萬籟靜心境兩幽寂焚香拭焦尾調軫橫陳膝琳琅太古  
音旨趣復誰識欲寫我心期聊以寄所適一彈江水清再

鼓秋月白月白與風清驚起魚龍出曲終獨徘徊篷窗風  
露溼

卽景

晝長簾乍卷飛絮滿妝樓燕壘紅輕綴鶯梭綠半浮煙雲  
千里夢風雨一春愁獨倚闌干曲時時憶舊游

陳靜淵鳳臺人大學士諡文貞廷敬女孫郎中豫朋女  
貢生衛封沛室有悟因樓存草

秋興

近日閒心少都緣愁病多案頭疎筆硯窗下廢吟哦露滴  
階苔潤風吹塞雁過悠然清興遠散步向庭阿

張貞太原人華士弢室

遠游曲

遠游那可了坐惜紅顏老花開隔岸林目斷江南草

劉若蕙諸城人諸生許瑤室有捧翠集

秋夜寄外

一片長安月清光兩地盈懸知千里客不盡故鄉情窗竹  
寫秋影村砧搗夜聲空閨愁不寐自語對鐙檠

李氏字淑瑩洛陽人

柬外

憑几修書寄便鴻詞箋恨短意無窮離懷正值深秋月紅  
葉青鐙煙雨中

霍雙字貞秋東光人

暮春

東山下林影西閣日光殘脈脈春風裏幽花生暮寒

寒食

人倚雕闌竹倚衣  
女桑遙聽子規啼  
陌頭楊柳休攀折  
繫住春光不許歸

范貞儀字一柏如臯人同縣貢生高纒室

詩話一柏七歲能詩及笄適纒未十年寡幼叔三幼子二皆教以成立

蘭塘曲

放權向蘭塘共愛芳  
心淺折斷藕中絲  
雖長不及蘭

春日經理綠雪山房

荒館經時未啟扉  
眼前煙景與心違  
頻逢風雨花應瘦  
久廢刪鋤草漸肥  
小閣香泥巢乳燕  
短牆蛛網掛春暉  
伯勞底事東飛去  
春晝年年未見歸

對鏡



匣裏青銅久閉藏  
暫時相對轉心傷  
飛蓬欲化三秋草  
瘦骨真成百鍊鋼  
香閣夢迴山月冷  
玉臺人去鶴書荒  
薛媛欲寫丹青寄  
天上人間恨渺茫

謝秀孫字季蘭甯都人魏禧室

自翠微山望金精

薄暮秋初風木葉  
下庭圃夫君招我游  
盤姍出坡樹山菊  
垂好花陰影隨行  
步幾折臨高厓歛足  
不敢顧夫君指金  
精謂此汝所慕吳  
王洞口來仙女雲  
中舉至今千百年  
煙霞生其處自憐  
長閨房荏苒秋草  
暮結廬十五載不  
識金精路夜月明  
空山時聞鐘聲度  
憶我七八歲曾一  
隨諸婦巾車到洞  
門嘿然生疑懼洞  
中忽有光雲殿凌  
丹雘翠竹搖空寒  
白日蒙雨霧彷彿  
記曲水海棠綠石  
戶草色映羅

裙逐伴踏花去，澗水溼弓鞋。逡巡避母怒，忽忽三十年。仍  
向峯頭住，世事幾興衰。家門亦多故，徵蘭不可期。弄瓦杳  
無與，出戶淚如絲。入戶淚如雨，人生能幾何。年光如馳騫，  
安得辭人間。灑掃侍仙馭。

池上秋海棠

芳草依碧池，佳花點秋石。綠葉與紫莖，何數秋蘭色。主人  
策杖行三徑，偶相值采之。置瓶中，顏色照几席。有如浣紗  
女，斜立石潭側。幽芳獨自憐，忽遇五湖客。沼吳果何人，撚  
花長太息。

林氏新會人，林奇鳳季女。襄陽申有功，室有畫荻草。

霜竹

孤挺三冬日，枝枝映楚湘。蕭疎持健節，蒼翠帶寒霜。月色

籠陰薄風聲引韻長林中還有實留得鳳毛香

菩提樹

智藥曾培植攜來西域船高枝成寶蓋清影散諸天  
虞苑流陰遠唐朝得法先自從盧祖悟色相總非禪

大通寺

海暝風和放小舟滿天煙景好追游青山疊疊渾無影  
綠水漫漫靜不流佛祖昔年留妙偈頭陀今日繼靈修  
菩提自是西來種今古禪參尙未休

秋夜獨坐

日來秋氣滿林塘獨坐閒庭過夕陽颯颯西風鳴晚樹  
蕭蕭殘葉落東牆閉門自喜紅塵遠顧影偏宜白髮長  
誰有凌霜真節操歲寒不使後凋傷

陳瑞麟字若蘭海鹽人有綠窗閒詠

陳迦陵曰若蘭著閨辭百首娟麗去花蕊夫人不遠

閨辭

春閨三月養吳蠶南陌柔桑滿竹籃為避行人回步急不知髻上墮牙簪

一自檀郎赴玉京殘燈挑盡淚盈盈黃昏又值芭蕉雨不管人愁滴到明

黃幼藻字漢薦莆田人議女舉人林仰垣室有柳絮編

詩話漢薦少受業於老儒方泰年十三四工聲律通經史歸林早寡家貧事姑盡孝近戚罕見其面年三十九患心痛卒臨終猶誦殘鏡無餘影幢幢之句聞者悲之

孤雁

渺渺高秋外長空一雁遲哀鳴關底事澹遠寫相思瘦馬

征夫淚迴文少婦詩明年樓上過莫向夕陽時

雨中看紫芍藥

晨妝乍點自傾城冉冉香生繡戶清厭說廣陵春色暮  
脂和淚雨中傾

恨白芍藥不開

萬種花開鬪曉紅含羞無語倚東風素妝不理因誰倦一  
段春藏粉黛中

登樓望海

遙山層疊海雲開浴鷺飛鷗自去回春水茫茫天不盡片  
帆浮動碧空來

黃幼蘩字漢宮幼藻妹

詩話漢宮與姊齊  
名以詠月詩著

詠月

清切空階月相依欲二更寂喧非一致千秋同此明蕭蕭  
庭中女俯仰觸中情對此令人遠况乃兼秋聲淺深各有  
感今昔甯無驚秋在孤吟外愁從何處生人生有代謝萬  
物有衰榮茫茫乾坤裏相積為愁城欲挽西江水一洗萬  
古情虛窗來素影清淚落寒檠

李氏安陽人高唐州判黃次女諸生黃履平室

詩話李能詩善醫痛父無子迎養十餘年父有軒名  
得得因以繼得名其室有詩志痛詩不能工可見至  
性

季冬淇邑感懷

寥寥書館客中居况值窮冬百事疎薄枕憶家千里外寒  
窗兀坐五更初飄零木葉侵幽徑落寞霜華滿做廬時繫

寸心歸未得殘燈挑盡獨躊躇

夜聞二子讀書

節屆清和夜氣涼蟾光皎皎映書堂吾兒頗奮螢窗志惜  
少熊丸教子方

思親

秋風拂檻氣蕭森兀坐紅窗思轉深烏烏尙然知反哺吾  
生卻愧不如禽

楊淑貞字端一金堂人潯州知府正輔女六安諸生閻  
鑒室

聞鴉喧憶親述懷

一烏樹頭集羣烏共喧呼老者似愛憐雛者如持扶老雛  
同依依孝哉至性俱物情尙如此嗟我何其殊憶我將字

日親悲淚欲枯一旦遠分離千里阻程途荒城魚雁杳生  
我卻如無恨我不爲男背親來事姑十五年瞬耳親容今  
何如親容日益衰親年日加諸親容與親年追思忽嗟吁  
感此物爭鳴誠哉不如烏三復蓼莪詩歎息欲廢書

病起柬井桐汪大姊

翠冷黃添逐病容修眉怯掃黛螺封簞痕輕拭流波膩幔  
影閒垂曲檻重五夜燒鐙挑荳蔻三秋覽鏡減芙蓉披衣  
小展裁桐葉撩亂吟情四壁蛩

秋夜

紗窗月透影朦朧丹桂香飄曲院風滿耳蛩聲秋唧唧玉  
階寒露冷梧桐

春日



輕寒款款逼窗紗日影穿簾燕子斜底事小園春未減一枝晴放碧桃花

曹炯字重光天津人有非非集

詩話重光幼耽詞翰詩思清妙其題愛蓮亭五律爲長者所賞謂此女他日當以詩名及笄卒

題愛蓮亭

面水一亭在臨風繞芰荷香消長日暑色借醉顏醺隔浦棲文鳥方橋引素波徘徊何限意竚聽採蓮歌

游仙

九天天路路迢迢闔苑奇葩盡吐苞憶得看時忘日暮歸來新月掛松梢

朝來洞口飯青精晚侍金仙宴玉京憶得昨宵松下坐月明星朗聽吹笙

龍氏昆明人劉恬聘室

詩話龍幼通經史善屬文劉聘為繼室未昏歿矢志守貞年三十卒王夢樓有過龍貞女故居詩云重門苔跡厚一徑閉蒼蒼里合名全節詩曾譜斷腸玉因含璞貴蘭以被煎芳寄語貞松質無須怨雪霜

暮春

卻憑何物餞春歸  
淚灑風前送夕暉  
鶯舌喚將芳草暮  
蜂鬚撩引落花飛  
池塘夢淺隨風繞  
庭院愁加帶雨霏  
已覺困人腸欲斷  
不堪還對柳依依

韓韞玉長洲人尚書諡文懿炎季女知縣顧渭熊室

沈歸愚曰前輩韓東籬太史述幼妹少讀羣書兼工詞翰年三十時著述已富病歿前盡取焚之不欲以文采見也渭熊從書帙中檢得十餘首比於吉光片羽云

詠鶴

丹頂元裳白羽輕  
芝田舊日得仙名  
生來雲水原天性  
望

裏蓬壺是去程代遠每過千載壽露寒常向九皋鳴不隨  
衛國乘軒隊穩卧松巔夢太清

錢紉蕙字秋芳號清蔭居士吳縣人中諧女許廷鏢室

有清蔭閣集

沈歸愚曰錢紉蕙太史中諧女武平合竹素許廷鏢室竹素以詩鳴吳中今之魯靈光也厥配亦高風格

度梨關

迢遞踰梨嶺肩輿勝兩驂雄關限閩越幽境極東南地曠  
常多雨雲開忽作嵐鄉閭望不極聊復上塵龕

野望

偶向東郊望蕭條物候非雲連山一色木落雁同飛歲月  
愁中促音書天末稀感時情不極惆悵返柴扉

新安江行

乘潮渡漁浦沓嶂夾江濱下瞰綠波影能令纖芥分筏移  
疑入鏡碓落自春雲聽盡潺湲水灘高易夕曛

征怨

萬里胡天斷鳥飛年年策馬未言歸西風吹急笳聲咽歷  
亂黃沙滿鐵衣

秋柳

江潭憔悴幾枝橫秋雨秋風愴別情猶擬攀條貽遠道可  
憐玉笛不成聲

陳秀貞臨桂人大學士諡文恭宏謀女錢塘陸燦室

詩話秀貞性喜讀書雅善吟詠雖生長華無而襟懷  
曠澹蕭然有荆布風年十四自粵遠嫁於杭每思父  
母事舅姑益虔語人曰吾始來歸時吾父誠吾以能  
孝舅姑乃所以孝父母吾志之不敢忘也卒年十九

菊影

分身老圃繪秋容真相依稀色是空落日移從霜徑裏疎  
鐙送入錦屏中終將不老隨宵月直以無香傲晚風悟卻  
浮生歸去也白雲揮手謝陶公

雪集卽事

小鬟輕曳錦幃幃偏報說平明雪滿天起擲繡鞋牀下下遠  
人身上合添綿

香奩移傍碧窗紗小鼎焚香自煮茶高捲疎簾看不足犯  
寒親手掬梨花

紅鑪高宴列中堂子姪傳鬪共舉觴無奈阿姑教強飲清  
樽微試鬱金香

萬花飛舞錦成團晚上紅樓作大觀直被天公迷望眼不  
知何處是長安

楊素書字韻芬秀水人錢塘夏之盛側室鳳翔鸞翔母

有靜宜閣詩鈔

詩話靜宜閣詩諸體俱工與吟紅才調相匹論詩法  
一首可見其致力所自其家藏有寫定本惜未刊行  
子鳳翔字子儀有愛日山房詩鈔鸞翔字紫笙  
有春暉山房詩鈔皆無傳本紫笙以算學名

論詩法

人生學淵源各各有所自沆瀣非一氣成功總難企我幼  
本憇愚況無明師啟義母愛拳拳略舉詩書旨及長學謳  
吟里言抑何鄙兩漢與三唐夢亦不到此我後歸會稽主  
人風雅士親炙獲師承漸解參奧理吟紅主愛女夕秀翩  
翩起五載共切磋我當畏友視曇華萎一朝慧業竟中止  
閨閣嗟裊裊獨吟殊無俚幸荷主恩深誘掖頻予歧例將  
愛女心教我亦如是且我受薰陶較女尤倍蕞小閣上燈

初寒衾夢迴裏有意無意間剖析微難紀真樂兩融融函  
文胡能擬許我詩學成爲我任剝削我縱鈍根鈍識此還  
遺彼辱承訓委宛頑鐵亦柔靡纔知傳不傳卽定學詩始  
才媛不乏人著作存有幾方其侍膝下塵情澹於水紅閨  
趁清閒倡和偕姊妹迨至賦宜家瑄屑籌鹽米師範日漸  
疎舊學日益弛卽使能自立初終志永矢夫子或拘孿家  
門或顛否何暇計千秋飄風埽蕻似度閣冷絮吟湮沒傷  
比比誰似我主人終身遂依拙著曷足論附驥覩顏耳  
邈想同心人情根總不死人合固天定天合亦人俟緣生  
因卽生寸心堅由爾我願廣陶鎔問字各歡喜安得有情  
眷團欒聯硯几

潘孟齊番禺人廣州教授梅元女王隼室

書懷寄夫子

慙愧蘭芝女還家恨解攜如何伯鸞婦翻作仲卿妻星月  
原同影鴛鴦不獨棲燭花隨淚盡愁聽夜烏嘯

陳克毅字盈素海甯人邦彥女孫嘉善曹相龍室有餘

生集

陸孫友曰盈素與余同歸曹氏盈素為夫子姪相龍婦其母汪夫人素以博學聞姆師之訓涉及書史年二十一來歸四載而寡遺腹生子未期殤一女亦能詩字錢唐徐孝廉未嫁以病死而母夫人亦相繼徂謝俯仰無依一身莞然每託於詩以自寫其伶仃孤苦之況題曰餘生集大抵緣哭母痛女而作情詞悽惻字字皆成淚痕勿第以閨中風雅目之

偶吟

衰年光景若為歡剗盡煩憂強自寬鬢已漸凋飄作雪心  
經九轉鍊成丹原無妄想參風雅賸有高懷寄歲寒領略



繡窗清淨味課經禮佛且加餐

徐珠淵字善懷江都人宣城施閏章側室

詩話善懷年十三有京宦過邢欲納為妾其母將許之遂泣曰彼執綉流也兒願得侍文人為東坡之朝雲後歸愚山初略識字時誦愚山詩漸能為五七言句愚山有和其寄北詩云莫怨經年別天寒耐獨眠老夫魂欲斷夢不到君邊和寄鏡詩云白頭相許件青山天意驅人不放閒寄到菱花將錦字斷腸獨自照離顏和懷北云少難離別老何堪錦字傳來淚一函莫為天寒愁北客夢中夜夜在江南愚山歿善懷朝夕哭奠五年猶一日終悵鬱以卒

寄北

風緊牽離別燈殘人未眠此身無羽翼安得到君邊

北寄小鏡

六月扁舟別故山勞勞旅况幾時閒傷心不啟匣中鏡千里依依伴客顏

懷北卻寄

雨滴梧桐秋不堪憶君誰共接清談  
老天如識妾心苦北地風霜盡入南

春日望北信

九十春歸感歎生黃梅時節乍陰晴  
香闥有淚無人見且倚闌干聽鳥聲

張昊字玉琴號槎雲錢塘人舉人義壇女諸生胡大滌

室有趨庭詠琴樓合稟

詩話槎雲讀書多神悟工詩詞年十九歸胡生文滌  
倡和甚樂嘗夢白鶴振翅於庭人言謂槎雲已盍乘  
吾以歸乎若夫婦七年之緣盡矣槎雲  
跨鶴背憑空而起有若神仙不久卒

秋晚

極目危樓上天涯晚望中雲憑荒野闊日落大江空露冷

蛩初響風寒葉正紅興來無俗慮明月在疎桐

觀潮

風急秋江晚潮聲落照前遠疑千練白高並一山懸孝感  
曹娥志忠留伍相賢千秋遺恨在故令怒濤傳

張昂字玉霄錢塘人吳妹洪文蔚室有承啟堂吟稟

詩話玉霄詩有云小樓不藏春愁已窮天海思近旨遠可謂善於言愁矣

悼姊槎雲

顛顛與心傷無言祇斷腸淚從今夜盡別是此番長滄海  
渾難問泉臺不可將芳魂心杳杳何日更同行

邵笠字淡菴泰州人諸生黃杜若室

詩話澹菴之庶母徐秀淑工詩因得其傳適黃杜若秀才中更家難四壁蕭然日惟爐香茗椀靜坐讀書

和夫子貸米詩

聯珠詩話卷一百八十四  
五  
莫以貧爲病吾儕本寂寥餅壘雖久罄意氣不全消張子  
仍存舌陶公肯折腰有鄰難貸米相對慰清宵

鄧繁禎字墨嫺如皋人藍田知縣士英女同縣冒禹書  
室有思親吟靜漪閣詩草

秋日

隱几人愁坐夜分暑氣消乍涼霜有信久旱海無潮蕉老  
心空卷蒲荒鬢共凋歲時閏後早秋事已蕭條

吳彩霞無錫人

贈周寶鐙

多生定擬蕊珠仙此日風流更宛然幾見名姬爲紫玉欣  
逢佳偶卽青蓮香心似雪姿尤麗秀句驚人骨亦妍最喜  
麟兒拋棗栗書聲共映綠窗前

張繫字采于吳縣人諸生吳詔室有衡棲集

沈歸愚曰奴愛才如蕭穎士婢知書似鄭康成向推劍南佳句得其意而翻用之以高隱重不才藻鳴也家風敦樸

於此可見

詩話采于詩溫柔敦厚得風人之旨歸愚賞其兒頑應笑同王霸婢鈍何須學鄭玄一聯謂可見家風敦樸余尤愛其初夏一首至性天然采于子岳通經術亦工詩受母教也

擬古三十韻呈大兄

憶昔承歡年最小舞綵堂前競梨棗春花秋月儘嬉游細  
帙牙籤學搜討綵綫閒臨綺閣前阿兄素志留青氈傳  
薛指人爭羨筆吐江花名占先馬氏眉峯推共白左家才  
藻叨同述璞碎終懷玉石疑伯樂未逢甘伏櫪潦落俄驚  
幾度秋相看霜髮忽盈頭敢憎世上炎涼態莫問人間青  
白眸造化茫茫真莫叩積德始知能裕後玉樹森森繞謝

庭一枝已奪天工秀杏苑堪誇早著鞭洛陽年少方翩翩  
榮封姓字題黃絹清要聲華著木天錦堂風月真無及曲  
譜新翻奏瑤瑟翠袖看嬌畫裏人斑衣笑舞階前色我本  
悲歌感慨流相逢喜語偏綢繆歡極每懷怙恃淚情深須  
念鶴鴿愁數奇昔共嗟難遇此日雲泥境殊異但能教子  
習書香豈憚丸熊與削柱早譽咸稱似舅賢操觚稍解攻  
芸篇化鵬弱翅慙無力願藉吹噓送上天

早春寄女

梅向南枝發堪思寄隴頭春風吹繡帙曉日蕩簾鉤惜別  
猶餘淚談禪未解愁何時一尊酒翦燭話西樓

舟行不寐有懷兩從子舍

遙憶相招日欣逢鵲駕臨銀河猶耿耿玉漏莫沈沈暑氣

潛消簟涼風漸透林愧無文乞巧笑指月穿鍼甚矣吾衰  
老賢哉爾意深幽閒修女則貞靜熟閨箴滌器烹新茗添  
香理素琴捲簾分樹蔭移榻就花陰嗜好皆投壁論交可  
斷金含愁伴整袂矚別更沾襟握手當年約相思此夜心  
敲詩鐙屢翦撥悶酒頻斟兀坐閒欹枕忘眠倦展衾村荒  
多吠犬山遠少棲禽暮景偏蕭索孤舟倍寂岑何時雙鯉  
寄爲我達知音

初夏喜大人到舍

屏跡多年與世違偶貪花信到柴扉典衣不惜沽春釀掃  
石何妨待月輝芍藥斂妝紅欲瘦芰荷出水碧初肥相看  
莫使花枝笑沈醉休辭酒力微

戲爲外子撥悶

明甲集言四卷一百一十四  
三  
失意休教苦自煎爲君把卷論前賢兒頑自笑同王霸婢  
鈍何須學鄭立滌器當爐情更洽操春舉案志猶堅久藏  
賴有牀頭醞莫負梧桐月正圓

依綠軒新霽

積雨初晴景色宜綠波新漲小庭池砌花帶露含紅淚徑  
柳籠煙斂翠眉稚子折荷擎碧蓋老農翦竹插疎籬蕭然  
長晝憑書枕一榻茶香午夢遲

柳

御苑千行遠接天碧如輕浪細如煙只愁春去花如雪幾  
度臨風倍黯然

漢宮

西風寂寂冷長門紈扇秋來有淚痕但得君心同月色清



光何處不沾恩

顧英字若憲長洲人印江知縣張之頊室

沈歸愚曰孺人蕭然四壁藥房蘿屋  
間時聞誦詩讀書聲遠近稱女學士

初夏送夫子北上

杜鵑喚春歸和風吹芳芷何堪對斯景把酒送吾子分手  
卽天涯惜此須臾晷別緒如繭絲柔情似潭水離懷寄孤  
鴻相思託雙鯉征途勉加餐努力拾青紫上慰高堂親下  
酬賢伯氏君行旣雅醇君才復俊美但保金石心豪門勿  
投趾桃李易凋殘松柏豈朝菱行矣勿悲嗟風雲自此始  
張令儀字柔嘉桐城人文端公英三女同縣姚士封室

有蠹窗詩集

沈歸愚曰張文端女工古文不專韻  
語端本殖學比於韋逞母之授經

詩話文端室姚夫人有含章閣詩柔嘉幼承家教以好學聞既歸湘門居棠花館諸弟恒與湘門分題角裁柔嘉亦出其詩歌古文辭辨析古今事不少休文和序其集謂姊所爲詩文輒哀前人法度論古有識用典精當

### 蠹窗對月

徘徊愛良夜吾廬有佳趣星稀月轉明冷侵階前樹疎影自縱橫正對鉤簾處藻荇散庭除水光還四布曲檻好尋詩修廊宜緩步寒花浮酒盞落葉添茶具鶴巢松樹顛靜夜如人嗽高天鴻雁鳴唳入秋雲去坐久欲忘眠煩襟感涼露欲寫此時情誰能展毫素

### 烏棲曲

金谷園中百尺桐慈烏將子巢其中霜華墜地月如水豔舞嬌歌畫燭紅石崇沈醉綠珠醒銀河半傾金翠冷後夜

高樓月自瑩不見珊瑚美人影

秋夜長

嚴霜倒浸簾櫳冷半壁孤燈寒耿耿秋老嗁殘絡緯聲月  
明瘦盡梧桐影嗁烏有意隔紗窗窗裏愁人淚一雙兩兩  
飢兒嗁下國迢迢頰尾滯寒江機中錦字休裁怨且織征  
衣還寄遠天涯若問此時愁一江春水猶嫌淺

採蓮曲

消夏灣頭露華曉風動芙渠香嫋嫋吳娃紅袖映花明中  
流爭羨鴛鴦好西施一笑迴雙眸芳香滿載木蘭舟酒酣  
玉簫涼如水西風莫遣吳宮秋

鬪草

綠窗曉夢鶯嗁醒粉薄螺輕妝不整瑤琴罷軫玉笙寒花

慵柳困春闈，永東鄰。女伴偶過，從相邀，莫負芳菲景。共向南園鬪草嬉。拏芳拾翠，搜求盡稱奇。覓巧自挑泥。玉尖甯怯蒼苔。冷袖中別出，謝公鬚神采，如生光炯。炯低回，暗自卜心期。小立花前，垂素頸。榆錢輸盡，拔金釵。人醉東風，依露井。乳燕鳴鳩，白日長笑聲。遠隔鞦韆影。

讀霍小玉傳

獸環鎖闥，青苔院。荳蔻梢頭春一綫。柳煙籠日，翠顰輕花霧著。人紅玉豔芙蓉繡帶寶。匳開風裊，釵梁雙玉燕。芍藥裁成絕妙詞。簪花小試琉璃硯。侯門白璧自無瑕。誰教青鳥偷嬌面。楊花飛入惹春愁。門外王孫嘶紫騮。錯認牧之非薄倖。同心縷帶縮風流。畫眉窗下調螺子。翡翠蘭苕風願酬地。老天荒情不變。烏絲素盟足千秋。銀箏錦瑟歡初

洽別鶴離鸞溝水頭密誓俄成烏鰂墨新歡又占鳳凰樓  
蕭娘骨瘦心如鐵宛轉纏綿難決絕羸臥空閨若箇憐鸚  
鵡窗前頻歎息訪求消耗擲金錢寶釵零落無顏色長安  
三月牡丹時契友相邀數陳說毗裂髯張忿不平多情感  
動黃衫客鞭馬羞過勝業坊胡雛強控黃金勒支離病骨  
倩人扶曉衾鞋夢芳心接含情凝睇薄情人聲聲訴出嗁  
鴟血穉齒韶顏飲恨終一慟重泉沈怨魄精靈苦妬後來  
歡數教所愛生離拆曷不追取負心郎貞魂化作紫鴛鴦  
紅珠露冷蓮房老雙宿雙飛向野塘

晚春坐春暉亭

結構無多地鄰園藉綠陰煙霞無俗態花鳥得同心雨足  
閒鋤藥茶香靜理琴此中塵事少頗似住山深

北郭尋秋

野闊風吹袖茫茫平楚間秋隨人意冷雲共客心閒鳥墜  
將殘夜煙生欲暮山怪他烏柏樹著意染衰顏

小院殘春

幾樹殘紅瘦不支綠陰滿地燕參差春歸細雨斜風裏客  
病輕寒薄暝時鬪草簾櫳人寂寂鞦韆庭院日遲遲柳花  
飄蕩東西陌閒殺青青百尺絲

焚香

空階冷雨夜廉纖寶鴨香消手自添細靄幾絲縈斷簡閒  
雲一片護疎簾人同臭味原離俗詩沁餘芳覺轉恬茗椀  
吟箋聊自適幽窗韻事許誰兼

早秋夜坐

冰簟涼生暑漸收  
雨痕洗出一天秋  
微風小院花香合  
淡月空階竹影浮  
繞砌亂蟲攬客話  
誰家孤笛喚人愁  
蕭蕭夜色清如水  
坐看星河漸欲流

秋夜作

雲外驚心旅雁草根和我寒  
蟲落葉打窗似雨  
嘯烏繞樹驚風

詠十姊妹花

東風萬物荷生成  
隊隊紅香照眼明  
衰病天涯憔悴客  
自憐同氣各枯榮

蠹窗

沈水香中夜漏餘  
月痕冷浸一牀書  
百城未敢誇南面  
且乞閒身作壁魚

元冥

北戶乃瑾凝陰沍寒兩儀混一雨雪漫漫何以禦窮修其  
旨蓄草木旣胎蟄蟲咸伏無視無聽以還純樸百爾君子  
宜謹嗜慾

五畝園舊畜二鶴忽隕其一孤侶哀鳴都忘飲啄詩  
以弔之

西風一夜返芝田仙蛻儀形尙宛然舊過蒼苔猶有跡重  
來華表是何年舞臨池畔悲孤影唳入秋空泣暮煙何處  
惹人情最切嚴霜落葉五更天

歲暮有感

空齋塵土鎖書籤兀坐無心掩鏡奩釀雪冷雲低礙屋鬪  
風乾葉亂敲簾人從百慮堆中老寒向單衫破處嚴短景



蕭條催歲暮可堪愁病更相兼

張若嫺字清婉文端女孫工部侍郎廷瑑女有緗素閣

遺草

隨三姑母游王相國恬園

何意人間有洞天雕欄花木鎖平泉鶯喉乍囀調新曲柳  
眼初舒過禁煙綠野佳辰容共訪蘭亭雅集快隨肩相期  
不負春明景紅藥翻階續舊緣

張似誼字鸞賓桐城人文和女孫刑部尙書諡勤恪若

淳女主事姚文燕室有保艾閣詩鈔

詩話鸞賓工書畫尤耽吟詠其  
篤天倫承家教皆著之於詩

初夏曉窗

嘒鶯驚曉夢強起未成妝覽鏡驚容瘦看書喜日長簾疏

風燕舞徑靜露花香不覺流光易  
枝頭杏子黃

春日移居有懷夫子十韻

斗室堪容膝  
翛然借一枝  
安居聊避俗  
閉戶好吟詩  
荆布頻年慣  
蘆簾此日宜  
靜中延弱體  
江上動遙思  
薄宦愁誰諒  
窮途恨獨知  
危疆需保障  
冷署重栖遲  
遠道鄉心切  
深閨別淚垂  
離情無寄處  
歸夢有醒時  
歲暮憂懷抱  
風霜入鬢絲  
小園春色近  
花發是歸期

宋素梅德州人

詩話乾隆十六年高宗南巡素梅年十二迎鑾獻詩

迎鑾

海晏河清代堯天舜日時  
不辭川路遠肯慰士民思  
紫氣欽皇輦黃雲護聖騎  
迎鑾來獻頌萬壽浩無涯

應召作

山左羣情切江南望幸頻九重深保大五載舉時巡浩蕩  
韶光麗葱龍物色新彩雲晴有象瑞靄靜無塵淑氣迎仙  
仗祥風繞御輪衢歌擊壤徧共祝萬年春

莊德芬字端人吳縣人河南提學道朝生女孫州同定  
嘉女武進董獨室乾隆己酉進士潯州知府思駟母

有晚翠軒遺藁

詩話端人中歲寡撫孤成立事實詳趙味辛所作家  
傳管韜山序其詩云集中五言如修名不早立妻子  
寒無衾人生知盡分豈敢希不朽白日忽已中夏綠  
隕其黃六翻苟不齊何以凌長風七言如雪重窗寒  
翦聲小官河水乾日一尺等句於感逝受遺銜幸茹  
藥觸緒紛來而音節蒼涼詞意淒惻古人何以過尤  
可異者慘沮之中絕無衰颯氣如辛卯感懷白頭織  
履憐衰病紫禁含香恐後時仰首青雲數行淚從來  
天道佑孤兒蓋聞心牧鄉試報罷寄詩慰安之也洪  
北江謂其詩及雜著上者無愧漢魏間人次者亦不

作尋常聞閭語心牧集遺編并舉五言如朱光馳  
素節白露肅清秋薑桂中年味琴書太古情七言如  
檐頭蛛網銀絲密牆角蝸涎玉篆明天邊燕翦裁雲  
錦池面魚梭織浪花石躡似虎心先怯樹暗如人馬  
易驚六朝人物歸詩卷三郡吳  
山列畫屏全詩不可得見矣

乙酉夏日言懷示兒

我志在立孤十載勤怵惕凌兢雪夜鐙黽勉灰中荻窮年  
抱遺編孜孜累微勩何爲運海鵬忽作退風鴟霜蹶驚一  
蹶悲鳴仍伏櫪一蹶奚足憂養銳期克敵先哲有高衢馳  
驅任凌轢朝華與夕秀芬芳供采摘紉蘭帶江蘼瓊枝光  
的皜性行旣修飭文章麗翬翟何難九千仞翱翔俯雲霓  
清光初夏東軒讀書  
朱明已涖節晝刻日以舒驕陽耀廷桂綠陰正扶疎披卷  
當午涼豁達開交疏清風來徐徐飄然動輕裾丹黃陳我

前聊以供畋漁咀華擷芳秀此樂真蘧蘧婦人休蠶織獲  
戾當何如所嗜已成癖良醫難易諸

夏日讀書示兒

朱夏景物幽閒居頗蕭散南風扇清涼北陸轡舒緩蟬嘶  
綠樹深蝶化青燕短疎簾隔朱曦晴波蕩虛館燒蘭煙結  
篆潑茗香浮盃稠疊紅牙籤參差青鏤管經義浩如海說  
者窮論纂且喜左氏誇并取南華誕文體逮六朝音韻昭  
華瑄堅思鐵硯穿勤欲韋編斷毋使心旌搖終期腹笥滿  
聖謨何洋洋四子梯六經至道有卷放妙理無聲形放之  
父寰宇卷之治家庭所貴篤信者終日常惺惺漸漬嗽其  
膏有若蟻聚腥十日示明畏九思戒墮冥惟苦日車速馳  
光不暫停誰揮魯陽戈三舍迴曜靈賢哉車武子夜深猶

聚螢

雜詩示兒

春風降和氣佳樹生庭中天意亦已厚所賴尤人工清泉  
灌根柢香露滋芳叢英華乘時發枝葉何青蔥美人愛馨  
香采擷歸房櫳秋蘭共紉綴貴與良玉同

吾聞燕國公爨火照書策范相未遇時帳中盈煙迹貴盛  
相門兒貧賤無家客青雲與泥塗勤苦同一轍志學抱堅  
心甯爲境所易誦讀知其人尙友若咫尺流光駒過隙分  
陰抵拱璧毋令寡母心戚戚憂乾沒

庚寅秋沅兒下第書寄

去年手中綫爲汝縫征衣江南四千里孤帆如鳥飛悠悠  
寡母心清夢常懷歸懷歸蘭陵道春風復秋草不辭嚙指

遲惟期立身早裁書附雁鴻言與藥石同六翮苟不齊何以凌長風今年棘闈戰淪落豐城劍空有氣如虹懸知淚如霰歸來季子顏羞見山妻面人事在苦學天心惟與善場圃且勿視良圖在三獻

感遇

勢位不可忽人生貴自強雖非君子言所見亦已長困龍蟠濁泥蚘肆何其猖飄風從西來雁字離其行炎涼一轉變疇能保初腸當時意氣佳直擬田與姜失路相依託栖栖徒自傷

夢亡兒巡

冰鏡映迴廊透池屬洞房涼波衣欲溼四壁含清光碧紗開六扇不記誰家院侍者捲綳幃愛子生相見驚喜前抱

明倫彙編 家範典 卷一百一十四  
持容顏似舊時相呼頻不語婉轉惜嬌癡悲懷三四載不  
分相逢再合浦珠重來平生願堪慰蝴蝶逐曉風蒼茫西  
復東羅巾近角枕一片杜鵑紅

感舊

辭親駕言邁泣別臨關口遠道效唱隨齊眉鏡下酒友義  
僭金蘭言激恆得咎謀身靡所安歸途忽先後丹心白日  
昭青松歲寒茂人生知盡分豈敢希不朽

江陵千樹橘成都八百桑我來值凋喪南山田已荒慷慨  
進言激導君君未遑白日忽已中夏綠殞其黃泉臺不相  
隨大義凜若霜古言立孤難赤手肩綱常

蚤起

春庭一夜雨瑟瑟鳴叢篠覺來知新晴枕上聞嘯鳥振衣



啟疎寮曉日射林杪餘霞天際垂一抹紅未了星星泣露  
花甕甕茁芽草清氣愛平旦百慮未相擾攜書對崇蘭幽  
香縈纈標

夢亡兒昌

死別已經時寢興懷慘悽感深召魂夢恍惚無端倪偉然  
盛禮服垂髻還佩觿摩挲問舊疾何處逢良醫欣喜命儔  
侶徘徊安棗梨噲咄風外鐘膠角牆下雞啟目失處所肝  
腸如刃剗

牆外老樹一株枝葉有熊彪顧盼之勢

河邊老楮樹巔屹古牆外時當五六月密葉張青蓋蒙叢  
罩晚煙蒼翠分朝靄蘋末青風生悠然發天籟時鳥藏其  
間羣飛羽翮翮圓吭呀晴陽綿蠻出翳蒼最喜納涼時長

空淨埃壙新蟾瞪纖目餘霞抹紅帶屋角望熊彪此意堪  
入繪

詠庭中樹示兒

昔看芽茁土枝幹忽輪囷春鳥安巢穩秋蟲化羽新扶疏  
深得地盤結豈因人坐見風煙長清陰蓋四鄰

過從女妝樓題贈

日映朱樓迴風來碧戶深叢蘭散幽馥時鳥度清音奩畔  
簪花格屏間刺繡鍼坐來香篆結蓮漏正沈沈  
雅服應希謝幽懷亦慕班奇花歸繡譜香草上雲鬟意靜  
琴中水心閒畫裏山自今來往熟日暮不知還

己丑十月廿二日書寄沅兒

孟冬之月天未寒故鄉喜氣盈門闌吾兒今日作秦贅朱

絲卻藉麟膠完六禮殊愧阮修薄且喜門第皆衣冠蘋蘩  
付託重賢淑故事須知追孟桓雞鳴昧旦相警戒令汝九  
萬扶搖搏含香簪筆排鸞鸞兒乎早致青雲端

田家詞

江南五月楊梅熟高田下田梅雨足割盡黃雲麥隴虛參  
差出水秧鍼綠長養風來稻葉肥家家乳燕拍簾飛沿村  
日暮繰車歇少婦梳頭換葛衣

聽雨曲

屏山掩盡瓊窗閉博山生潤疑龍氣謝娥嘔坐怯單綃梅  
風吹送悲秋意樹葉聲微雨腳稀欄邊浙瀝沾苔衣碧泉  
引滿鐺欲沸青葉下筐蠶正饑倏忽奔騰一千里琤璫鐵  
馬雲中起曲次檀槽十部催四絃歷亂揮纖指急溜前檐

復後簷燈花溼影搖重簾南潮鳴咽流水盡一夜綠萍新  
漲添

交城作

碧嶂峻嶒勢插天彈丸城郭簇人煙劉家冠劍遺邱隴狐  
氏英靈肅豆籩風起塵沙迷去路雨餘琴筑聽飛泉爰峯  
佳氣常蔥鬱古柏蒼蒼不記年

桐圭帝子舊封都參宿光中治一隅地有古風歌蟋蟀村  
當落日嘯於菟高齊舊事漁樵熟智伯遺踪榛莽蕪南去  
晉祠流碧水擬將桂酒薦芳菰

月夜渡江

布帆風正遞行艫江闊潮平一練鋪秀色蒼蒼迷北固安  
流渺渺下東吳坐思謝眺新詩句行看王蒙好畫圖回首

瓜州煙樹遠廣陵關上玉輪孤

山雪曉行懷呂氏妹

亂峯稠疊玉爲尖殘燭光寒照撒鹽千里暗雲屯石徑五  
更疲馬怯金銜危陂凍合行頻滑絕壑風生氣倍嚴遙憶  
碧紗扃四扇鵲爐香爇夢方甜

毘陵驛曉發

古驛霜風颭去旌此行非是賦東征官河北上一千里客  
路西馳十五城浦外寒煙迷雁影雲頭野刹遞鐘聲憑舷  
滿眼皆冰雪自喜襟懷似此清

暮春過呂氏妹宅

曲院重來舊藥欄單衫時候棟花殘芳樽勸醉嘗鳧臠碧  
椀浮香破鳳團自愛琴書成雅集不勞歌板佐清歡與君

得盡論詩興一任紅珠瀉燭盤

生日

猶是塵中荆布身徒增馬齒說生辰義方教尙慙三徒罔  
極恩難報二人落筆詩篇當清吹到窗風月算佳賓濁醪  
引罷還游目桂正秋風竹正春

志慟

擬千寸祿奉慈幃太息廬江志每違寂寞黃壚終抱恨淒  
涼白髮更何依鐙昏孤幌人何在花落空庭燕獨歸撫景  
心傷眼前事時時雪涕爲君揮

丁丑春日述懷

黃鵠孤飛第四年誰將憤淚達重泉鶯花歲月供多病冰  
雪襟懷只自憐丹穴未逢悲屢空青氈猶在慕三遷清齋

半偈消磨障心在蓮花繡佛前

秋夜懷兒女

玉宇無雲夜氣清  
乍涼庭院坐三更  
紫蘭牆腳蟲相語  
皓魄枝頭鳥自驚  
千里音書頻北望  
一生詞賦慕東征  
遙知汾水逢南雁  
遠目應傷陟岵情

辛卯十月感懷

迢遙關塞雁飛遲  
聞道青萍又見疑  
相馬未能逢伯樂  
彈琴何處遇鍾期  
白頭織屨憐衰病  
紫禁含香恐後時  
仰首青雲數行淚  
從來天道佑孤兒

怨

團扇新詞出漢宮  
珍珠一斛賦樓東  
鵲唬蜀國花枝冷  
鶴唳鍾山蕙帳空  
塞北將軍歸不得  
湘南騷客思無窮  
人間

更有窮途困對泣牛衣歎鬢蓬

奉寄家大人

老父高情愛閉關逍遙詩酒卧南山煙霞久住紅塵外鷗  
鳥相尋綠水間佳卉庭前開錦幔遠峯屏上簇螺鬟天涯  
弱息歸難得問寢頻勞夢往還

有感

樽前風味憶蘇州橘釀初成瀉玉舟細滑釵莖烹雉尾勻  
圓珠顆剝雞頭一窗疏影梅花月兩鬢生香桂子秋三十  
年來鄉國夢每隨江水向東流

乙酉仲春家大人來視別後奉寄長句

喜拜嚴親鳩杖前東風菖葉杏花天蒼顏白髮觀茲世酒  
量詩懷似昔年遠道暫來看弱息空囊無計奉初筵漉巾



村醴權稱壽出網江魚算割鮮駐景願求千歲藥負暄還  
御八蠶綿歸梁落燕飛仍急出谷雛鸕轉乍圓服訓久諳  
蘭可製酬恩真信海難填桃溪篷艇朝衝雨蘿徑奚囊曉  
醉煙綵服追隨樂真隱吾廬遙望白雲邊

人靜

人靜空庭月似鉤淒涼懷抱怕清秋泉門一閉無開日獨  
任人間萬斛愁

夢歸

螺樽香冽泛新醅小閣開簾對早梅二十年前幽絕處謝  
家庭院夢中來

甲戌歸毘陵

丙舍荒涼閉野煙碧苔青草自年年送君此地君知否松

柏蕭蕭認舊阡

過青墩將游青山莊爲雨所阻

城隅曲水放蘭舟乘興名園作勝游咫尺樓臺雲霧滿一天風雨隔丹邱

泥滑溝塍水自喧筍輿扶上渡頭船今朝多少游山興都付松煙染畫牋

長天暝色近黃昏遠樹低迷認水村欸乃聲中吟未穩輕橈如箭過青墩

宿金壇懷沅兒

卧聽巖城報五更酒醒時節旅人情水寒風急雲陽道念爾扁舟棹雪行

憶沅兒渡江

江梅江柳弄晴煙燕子磯頭霽色鮮  
願得蒲帆懸十尺樵風穩送渡江船

晚寒

小雨初晴草未乾殘花如霰落簷端  
春衣典盡風還起四月窗能耐薄寒

送海門弟歸里

送爾還登桂楫舟淡雲如水月當頭  
歸心一逐南飛鳥卻望蘭陵是舊游

盡日論詩人復散講堂寥落酒瓢閒  
遙知骨肉月賡吟處桂樹初花滿故山

蔣季錫常熟人大學士諡文肅廷錫女弟華亭王圖燿  
室侍郎興吾母有挹清閣集

車遙遙

車遙遙揮駑馬紅塵撲面金鈴遲鞭呼恃有驅車者路旁  
楊柳藏驛樓十里五里行不留蒙山之陽泗水北石路險  
澀程途憂僕夫告瘁往復來行人多向黃金臺晚月晨星  
競馳逐三萬六千雙轉轂車遙遙駑馬驕農家家近白蘋  
浦幾時歸去乘吳舸

春日書懷寄呈家慈曹太夫人

經春風雨興闌珊瞥見庭花暫解顏十載未歸虞仲里終  
朝長對陸機山裁雲有句憑他巧賦雪無才信我頑最喜  
板輿無恙在何當芳徑一追攀

侍袁太夫人夜弈

小院梧桐月滿時夜涼無事試敲棋婦姑原有相傳譜莫

怪今宵下子遲

家園新茶寄大兒興吾

纔交穀雨摘旗槍焙得春茗寄遠嘗畫省烹時須細品可能比並婺源香

鍾令嘉字守箴晚號甘茶老人餘干人鉛山蔣堅室士

銓母有柴車倦游草

詩話甘茶夙善文章歸非磷時家故窰空嘗於除夕大雪抱兩月兒坐冷屋中括三錢市酒相對飲非磷謂得毋戚於心乎甘茶笑曰古人處此者多矣君文夫亦動念耶兒即心餘也非磷常出游心餘方四齡甘茶口授四子書及唐詩以幼不能執筆乃鏤竹枝為絲斷之詰屈作波磔點畫日教合之成字心餘年十五熟九經始出就外傳及成進士官翰林甘茶就養京師既而曰兒才非適時者不如歸也遂告歸心餘主書院講席十餘年以行誼文學為時推重知心餘者皆升堂拜母心餘恆言昔人以祿養吾以學養猶昔所授於母氏者也

登太行山

絕磴馬蕭蕭羣峯氣力驕蒼雲橫上黨寒色滿中條返轍  
河如帶捫車迹未遙龍門劃諸水禹力萬年昭

臘日寄銓兒

北地寒威重憐伊客裏身音書差慰我貧賤莫驕人失路  
皆由命安時卽報親師言當服習莫負誨諄諄

汝婦能承順無時離膝前居然兼子職久已得姑憐生育  
宜佳氣平安似昔年傳聲語夫壻孤館減憂煎  
汝妹依邱嫂幽窗共食眠穿鍼纔學繡識字不成篇閨訓  
粗知聽童心未盡蠲歸期甯解卜時刻擲金錢  
頻年思子淚前月抱孫纔憶汝孩提似原他祖德該唬聲  
勞客試秀骨或天來歸日應過膝聞當笑口開

心情憐下第約略似前番官道應攀柳家庭已樹萱恃才  
防暗忌交友戒多言結習還當掃新詩莫訴冤  
力學看駒隙從游汝得師遙分五秉粟足供十人炊汝友  
皆相念肥甘數見貽呼吾如若母問慰過時時  
僕婢愛菘韭同鋤半畝園門關饒歲月居僻遠塵喧夜火  
機伊軋家人樂笑言眼昏今益甚書帙懶重翻  
夢爾天涯路肩輿往復頻師方爲講學客豈是依人駟馬  
題橋志雙親屬望身而翁墳上草今已四回春

送銓兒赴禮闈

半生常在別離間又整行衣厚著綿雙眼漸昏鍼綫亂寸  
心無著夢魂牽關河此去風霜遠骨肉何因聚散偏不用  
登高望親舍泥金須早慰堂前

題自繡梅花詩圖

屈鐵孤梅葬古苔  
巡檐寒萼凍難開  
分明一幅鷺溪絹  
繡出詩人小像來

淚珠成串上殘絨  
十指寒香敵朔風  
驀地停鍼魂欲語  
梅花如雪照房櫳

身後君無封禪書  
迴文老去底須摹  
他時留與兒孫看  
此是安人繡字圖

陸鳳池字秀林青浦人知縣祖彬女上海曹一士繼室

有梯仙閣集

詩話秀林好吟詠尤喜讀離騷嘗私語曰吾愛楚詞  
恐年不永已而果亡年二十七女錫珪錫淑錫莖皆  
能詩

梯仙閣閒眺



風團花氣沿溪煥  
暗雨明霞紅不斷  
燕掠汀洲人語稀  
畫橋煙薄蘆芽短  
日景曛曛殿閣攢  
簫聲縹緲水雲寬  
游船散去鳥飛絕  
向晚山光撲鬢寒

冬日寄外

煙水迢迢泛木蘭  
寒風殘雪怯衣單  
客裘自著江邊雨  
莫作臨行淚點看

陳氏貴筑人兵備道法季女諸生周承元室

詩話陳方八歲父課以小學五經十三歲教以李杜韓蘇諸家詩十九歲歸周氏夫婦唱酬人稱佳偶

思鄉

閩苑蓬山道路長  
海天愁思正茫茫  
迴腸一似桑乾水  
萬轉千盤繞故鄉

曹錫珪字采蘩上海人給事中一士女知縣葉承室有

拂珠樓集

詩話采繁姊妹早失恃幼撫於伯母于歸後葉初宰常山嗣改教授還采繁食貧蘿屋高詠自如

詠愁

曲闌干外小樓頭芳草青青逝水流明月黃昏人乍別落  
花簾幙雨初收張衡詩就金刀暗潘岳吟成玉鏡秋最是  
好風吹不到五侯亭館野人舟

寒食

禁煙時節正東風蝶舞鶯囀戀落紅一寸迴腸十年事都  
來夜半雨聲中

曹錫淑字采苻上海人一士女陸秉笏室錫熊母有晚

晴樓詩藁

詩話采苻幼承家學十歲學詩即解源流既長遂以詩名四庫提要稱其詩以性情深至為主不沾沾於

偶儷聲律之間耳山少受詩學於母有絕句勸之妹  
錫莖字采藻歸陸爲繼室亦能詩有五老堂詩藁  
哭表妹趙莖芸

流水高山記昔年不堪重結聽琴緣與君同蹋西樓月今  
夜冰輪依舊圓

鐙下課大兒錫熊古詩拈示一絕

夜長鐙火莫貪眠喜汝繙詩繞膝前漢魏遺風還近古休  
教墮入野狐禪

曹蔚文嘉善人相龍女錢塘徐紹堂聘室

舟中

帆挂清江迴連天秋水長煙波千萬里何處是瀟湘

小園晚眺

小園何處堪閒眺薄暮雲峯鎖斷虹幾點鴉沈殘柳日數

聲蟬噪晚梧風

宋景衛長洲人諸生程樹聘室

詩話景衛正俗歌修身盡倫歌至  
理名言何讓班誠不當以詩論也

正俗歌為陳媛作

陳媛名淑睿字于林未及行而墻  
殤居頃之有請昏者遂自經死

高其義又聞其為前明檢討  
五經先生繼之裔作詩美之

禮義廉恥四維立綱常名教萬古植無愧於口無愧身無  
愧於身尤汲汲婦人再醮知身污若乃未昏心每惑一身  
那可容二心心失誰云身不失卓哉陳媛毓名閨五經先  
生蘭芽茁習禮明詩幼字林桃天未賦所天卒烈女不肯  
更二夫相從地下尋靈匹見者哀號聞者悲大吏上言采  
訪實旌門表墓佇恩榮文人詩歌盛緇帙嗟予抱璞稱未  
亡傳聞益覺心悽惻閒嘗讀書考五經管窺易象參豕翼

男女睽而其志通已字未娶可推測坤道含章利永貞從  
一而終恆其德苦節悔亡不節嗟安節之亨甘節吉人心  
道心辨尙書精一微危中允執動罔不凶德二三終始惟  
一臻厥極忠貞世篤緬家聲無忝爾祖躬自飭詩經三復  
柏舟篇髣彼兩髦我儀特斯人去也矢靡它勿匿初心矢  
靡慝在室自誓首共姜聖人取爲後世則郝鄒諸儒闡說  
殷郝仲興鄒肇毓死同穴而穀異室柏舟齊女中壘編乍  
至城門衛赴急保母請還置罔聞竟入持喪表衛國凡未  
適人許嫁矣春秋經傳標特筆僖公九年書伯姬何休公  
羊洞經術字而笄之待成人繫屬於人養貞一明與未字  
之女殊原貞援引曝書集朱竹垞爲高蔣氏女而不婦貞  
爲行盲左穀梁弗沿襲共姬比例聖所褒堯峯南昉說堪

憶彭旣庭女字于計未昏殉節汪堯峯作志以共姜比例彭南昀爲吳孝貞志銘卽踵之許嫁纓爲

禮記文名以行媒遂相識兩家齋戒告鬼神壹與終身不  
改革娶有吉日未成昏夫死亦如壻弔泣女服斬衰往夫  
門未嫁服同已娶式婦人不二斬謂何天不二耳儀禮悉  
可服可往明可從愛人以德休姑息舉世昧經謂過中此  
旨不明道幾熄人求盡倫安能過五倫祇恐常不及由來  
夫婦比君臣策名亦有未受職清風孤竹師夷齊商朝未  
祿周恥食推觀子弟事父兄豈必一一親顏色父子繼絕  
或背生兄弟前後或南北追思孝友自性成非緣見面乃  
盡力朋從尙友及神交甯須把臂投膠漆揆此可知婦與  
夫性眞相感當循率殷情何必同衾幃問名已定羞差忒  
當知勉義非溺情身潔心安理亦得幼從父母最初言初

命是遵戒私暱不悖於理曰無違許嫁之語由親出弗虧  
其體弗辱親立志不渝貴在必奪則隨亡不奪存志不可  
奪命則畢愧存不若無愧亡幾希人禽謹出入守貞殉烈  
易地同一心不二絕矯飾卓哉陳媛大節章浩然正氣兩  
間塞傷悲自署望門寡門在望矣未許卽旣云寡矣難再  
雙茲言至正非偏刻鵠甘獨宿歌三年鳩告雙飛媒一遍  
遂將性命付輕綃僅留心事傳遺墨視死如歸豈博名舍  
生取義甯圖逸惟媛家學五經明察於倫理昭作述天經  
地義古今垂永永幽光爭皎日

修身盡倫歌示諸娣姪

立天之道陰與陽立地之道柔與剛立人之道仁與義人  
參天地維綱常曰人自是兼男女女豈非人甘自阻甯惟

男子希聖賢賢媛聖女有徒侶五官同具官則思五常同  
秉常獨知三從應亦惇三物四德由來張四維從父從夫  
及從子謂從大道莫背此從茲不辱理無違步趨德行藝  
而已功在宜家德潤身言關名教謹笑顰容貌端莊非豔  
麗禮義廉恥當遵循正用其情是率性善養其氣是立命  
惡欲更有甚死生偷彊祇因殊肆敬人心道心辨危微克  
念罔念分是非精思弗奪立其大良知用致審其幾守身  
慎獨惟求是在彼君子女釐女士無愧於影無愧衾庶免小  
人同受誓太上立德次言功不朽當共男子同莫云女子  
無所事德功言在人倫中夫主如君原不異男忠女節曷  
有二繫纓結帨心齊堅處變安常身等致愛媳愛女等愛  
兒義方尤賴母兼師前遺旁出并抱嗣一視同仁方盡慈



母邪父邪孝姑舅嫂婦諸姑信朋友同堂娣姒女弟兄妾  
婢視臣如足手爲女爲媳爲母妻平生閱歷涂母迷自欺  
自畫皆暴棄徽音在昔宜思齊窮通壽夭任彼遇特立毋  
隨流俗誤內則中饋事女紅不願乎外行我素雖然苦樂  
由它人樂可自尋苦勿瞋天爵良貴何曾賤日新富有何  
憂貧人生百年那能久外物奉身竟何有自來列女至今  
存德立名垂真不朽具備功言洵美才才華根本德生來  
有節無才便是德有才無德誠堪哀德爲主也才爲輔允  
矣能文亦能武貌非所重隨賦形崇德踐形須法古以書  
相證克儉勤何妨識字能詩文國風半屬婦人作傳經續  
史章令聞詩文闡理鄙雕琢作字甚敬卽是學德發爲才  
著德容超出庸凡迴卓犖世羨女佛與女仙姑尼孰箇知

眞詮空障淨塵惟遏欲入道豈必談元禪聖人不過人倫  
至察於人倫大賢示五官盡職備五常三才參贊體易始  
巽爲風兮長女乎兌爲澤兮少女呼離明中女乾坤照女  
亦宜爲君子儒是人豈肯居人後出見紛華遂爾謬奉盈  
一覆水難收尙其無愧於屋漏無形之刑每在懷斯人斯  
可謂之佳善信充實乃爲美西方美人庶得儕慎終保始  
起迄止制外養中表符裏防微處處銘盤孟避嫌刻刻嚴  
瓜李嗟予未嫁稱未亡靡宅靡慝師共姜節大餓小伊川  
訓廣平鐵石爲心腸若夫所處無不幸端宜中正而主靜  
蒙以養之自幼嬰少成習慣時加省女子須教本考亭明  
白論語及孝經推之女戒并家範定性好學先人型夜氣  
凜凜旦晝枯幾希人禽恆勉勛諸艱歷試久鍊金織塵難

染無瑕玉貞以得一清甯  
伴閑邪敬直女德修仁可成而  
義可守天合剛而地合柔  
主一無適聖賢志天地之道物  
不貳日月有光崇效天山川有恆  
卑法地

方京字彩林番禺人殿元女金縷室祖靜母

詩話彩林工書有鍾大傳遺意詩承父教歸愚稱其古詩宗漢魏近體宗盛唐故所著無宋元氣味

薤上露

薤上露日出晞朝權花日暮萎  
微物轉瞬間人生諒如斯  
彭祖帝堯民亦復同所歸  
服食求神仙仙成竟何時  
守道以待終令名庶可垂

送孟調大姪南還

相對疑夢寐言別百愁生  
孤飛易爲感使我心魂驚  
聚散人生常此別難爲情  
爾我本一樹相期共枯榮  
爾今折枝

明眼卷言匯卷一百八十四  
條芽肄何時萌沾潤我本懷老髦願難行爾今返吳中閉  
門守經經勉哉崇令德努力以揚名取法不在遠祖父有  
遺型周親我老矣垂涕重丁甯

示長媳楊珊珊

十年爲婦蓼莪餘疏水家風樂自如宛似舉場勤苦士妝  
成惟對古人書

楊珊珊字珮聲浙江山陰人賓女按察使金祖靜室

詩話珮聲與姑方彩林皆以詩名沈歸愚謂  
姑近儒者婦近書生閩中樂事備於一家矣

鄉思樓

旅寓金閶春復秋親年多病老依劉嗟予未識鄉關路廿  
載空登鄉思樓

吳受竹長興人有萬卷樓詩草

戴蕝塘曰詩集聊城鄧汝功作序  
稱爲師母汝功乃少宗伯鍾岳子

故明宮詞

瓊樓十二浸涼波枕上秋風斂翠蛾隔院忽聞天樂近玉

簫吹處月明多永樂中高麗進四妃權貴妃尤美豔善吹簫最見寵幸

雲鬟不整玉容愁再拜重華卻蹇修銷盡蛾眉無限妬世

間復有女巢由長陵仁孝徐后薨聞其妹妙錦美而賢使持節聘之以病固辭宣德間張太后死至

宮中朝見爭羨曰是薄皇后而不爲者

雲在瑤階月在池藕花香裏寫烏絲深宮只奏南薰曲不

似驪山避暑時獻陵嘗於池亭納涼彈琴賦詩有風送藕花香句

水晶簾捲月黃昏蟋蟀秋聲徹禁垣鬪罷每邀天一笑朝

來分賜小雕盆景陵有御用戲金蟋蟀盆宮中俱鬪蟋蟀戲

西風瘦影銅長門一片寒碁欲斷魂聞道貴人曾賜死始

知樵悴是君恩

德陵成妃李氏客魏矯旨革封

朔風獵獵響寒空衰草黃雲入夢中料得君王眠毳帳繫

腰猶憶玉玲瓏

裕陵既復辟嘗入內帑檢故物問太監劉恒日記有玉玲瓏繫腰今何在

幸車深夜出重門悵微吟達至尊三十六宮寒月白一

篇紅藥獨承恩

成化中選掌禮嬪如時邵貴如應選託疾居外宮偶夜坐自吟所製紅藥詩茂陵聞

之遂召幸

深閉堯門獨影哀玉階春盡長青苔無情鸚鵡雙棲處天

語香浮嫩豔杯

茂陵紀貴如為萬妃所構謫居安樂堂即誕孝宗處也茂陵有鸚鵡啄金杯上刻

赤鸚青雀各二櫻桃十六顆是時前星未輝義取四妃十六子也

重重魚鑰鎖黃昏舊枕珊瑚總淚痕寄語江南紅粉女莫

將玉貌勾君恩

邵妃於嘉靖中尊為壽安皇太后命選女入宮母下江南

碧檻紅欄十二重羅衣繡帶盡當風由來天上無人地何

事隄防問守宮

秦陵試守宮論沈瓊蓮稱旨擢第一

杭澄字清之號筠圃仁和人世駿女弟趙萬暎室有卧

雪軒吟草

詩話清之少時工制舉文早失所天涉艱嬰疾故詩多愁苦之音

獨坐

久坐不覺暝羅衣怯晚風遠星隨月後孤嶼入雲中歸鳥爭棲樹浮煙欲蔽空天涯一長望懷思正無窮

辛未五十悲吟

十載傷心淚何曾一日乾老深無後痛貧覺立孤難寂寂墓門草深深智井欄此身原已死休作未亡看

春日寄懷湛堂

晴煙漠漠柳絲絲腸斷春江是別時千里相思兩行淚三

年光景幾篇詩生涯似兔初營窟蹤跡如蟬不定枝卻怪  
天遙人留滯何年得遂鹿門期

高氏華陽人大將軍威信公諡襄勤岳鍾琪室

揮珍浦曰威信公以平番寇功顯嗣退居林下築室  
百花潭側寄情花鳥著有薑園蛩吟二集夫人嫺弓  
馬善理軍政亦能詩與公  
唱和聯吟洵天生奇耦也

雨中看芙蓉作

芙蓉花發靚妝新細雨微風洗庾塵有淚卻同湘女恨無  
言豈作息嬌嗔遙思洛水凌波襪想見華清出浴人相對  
莫愁秋寂寞一生顏色不傷春

張佛繡字抱珠青浦人進士梁女諸生姚惟邁室有職

思居詩鈔

詩話抱珠父工琴從授指法年二十嬪於姚氏姚病  
肺時時卧牀抱珠亦善病夫婦相敬復相憐也年二



十三卒姚輯其詩鈔  
梓行之未幾亦卒

秋日雜詩

秋氣入我樓西風報初寒  
郊原過微雨景物肅以閒  
澄泓泛遙波蒼翠浮重巒  
草荒露華白林媚楓葉丹  
海燕去不息落木紛江干  
榮瘁有代謝節往獨無還  
自非達觀人誰能弭憂端

夏日池上

小亭涼氣多一榻掃煩燠  
四面環清流閒坐豁心目  
曲徑轉危橋古藤蟠老木  
山光當晝寒竹色上衣綠  
時有薰風來荷氣自芬馥  
幽鳥唳深林疏花落棊局  
終日遠塵氛蕭然似空谷

擬謝元暉郡內高齋閒望答呂法曹

郡齋亦清曠俯仰窮幽深澄川映疏牖孤峯秀前林風清  
獨鶴唳日隱飢颺吟不醉樽中酒空對窗閒琴思君安可  
極朝夕勞中心幸藉精神通惠我良書音何時慰延頸嘯  
傲凌高岑

寄懷愛庭四兄

端居寡物役遙夜屏紛慮罷琴坐西軒朗月出高樹念我  
同生親迢遙隔雲路誰禁慕遠懷偏與清景遇關山無窮  
極滄波安可渡喜接良書音春風三月暮離思落花前紛  
紛已無數瞥眼又殘秋芳草委繁露寒蛩牀下鳴鴻雁雲  
端度良會豈無期歲月不肯駐俛仰何所言恍然傷幽素

游橫雲山莊

一徑穿林入雙扉面水開有山都抱屋無砌不封苔雲氣

縈衫袖嵐光落酒杯到來塵境隔何必問蓬萊  
地僻松杉古寥寥人跡稀寒花含宿露紅葉舞斜暉山鳥  
間催句溪風冷透衣笑言深樹底相對檐忘歸  
倚檻徘徊久遙巒起夕陰桂香傳道氣梵唄印禪心遠寺  
寒鐙小虛窗皓月深一篙秋水闊何日重相尋

秋霽偶成次小姑韻

野塘波冷落紅葉茅屋蕭然涼雨餘一桁山光圍几席半  
簾松翠溼圖書遣懷詩句乘閒寫愛月心情爲病除負卻  
滿前秋意好素琴三弄樂清虛

春霽

檐聲向曉初斷一半春過夢中花笑林梢旭日鳩鳴屋角  
東風溪光暝漾清淺草色晴連遠空晝永煙消寶鴨閒情

聊寄焦桐

曉起

捲箔延輕涼  
槿花嬌欲吐  
一鳥忽驚飛  
蹴落花梢露

暮春

鳩婦催晴三月天  
東風無力雨廉纖  
翻書啜茗消長日  
滿院飛花不捲簾

十二月九日雪用東坡聚星堂韻

小樓香氣銷雲葉  
日暮江村正飛雪  
穿林入隙自悠揚  
衣袖輕沾亦幽絕  
捲簾閒坐不知寒  
得句欲書兔毫折  
黯靄山尖翠影流  
模糊徑曲人踪滅  
岸旁漁舍煙不起  
風際青帘凍難掣  
爽如秋氣滌襟懷  
光若朝曦眩眼纈  
試煮牀頭新漉酒  
鑪炭紅餘一寸屑  
憶得前年呵凍吟  
堪惜韶華成

一瞥此時歡樂比屋同來歲豐穰互相說夜深清響落風  
篁夢破重金衾冷於鐵

姚允迪字蘊生金山人巡道培和女知縣戴鳴球室有

秋琴閣詩鈔

元日同諸兄分韻得潔字

朝陽破雲翳朔氣變華節簾櫳鳥語新石鼎香初爇堂前  
拜嘉慶長幼咸欣悅柏酒次第斟盤蔬隨意設風暝景物  
佳檐梅折晴雪過午山齋靜琴書自閒潔相將茶一甌拈  
韻擘綵纈諸兄富文藻願我慙薄劣興到亦長吟遑計工  
與拙且遂今日歡歲月任更迭

苦熱

碧空高高火雲厚溽暑著人如中酒斗室渾同深甌蒸當

檐恨不栽榆柳竹牀莞簟卧不得長筵何曾暫離手况逢  
久旱禾苗乾桔槔戽水鳴前灘農家婦子汗流血足繭皮  
焦力已殫我廬正與田疇接默坐思之心惻惻安居尙畏  
炎威逼天生烝民皆食力勤者辛勞惰者逸願得颺風驅  
雨來比屋俱變清涼域

樓中卽目次大姪女韻

斷虹收宿雨野色捲簾浮風起孤村暮煙深遠樹秋山光  
明日腳帆影破潮頭想得憑闌處吟情一倍幽

春雨

織煙凝霧一絲絲灑徧東風綠野滋弱柳縈愁低翠黛落  
花無力溼燕支涼生深院燕歸早潤逼熏籠香散遲苔色  
滿階簾不捲午餘銷倦獨吟詩

納涼

流憩竹林中翠影濃於幃幽禽不見人飛過低枝上

雨後

飛雨颯然至一峯天外青荷花香不已涼透水心亭

夜來香

一架延緣引蔓長淡煙微靄弄新涼夜深欲摘渾難辨葉底風來忽有香

徐夫人以西湖圖見贈走筆謝之

狂沙入戶春風顛他鄉度日如度年囊琴束書了不御羈愁忽忽心茫然謝君惠我圖一幀西湖萬里來窮邊不知兩眼困塵土斗覺滿座生雲煙前年我也曾游此正值柳嫩花初妍艤舟處處尋古勝孤山山下重流連逋翁已沒

梅鶴老野桃蹊杏空嬾娟夜登湖樓更幽絕明月恰挂山  
之巔枯桐一奏萬籟息平湖十頃波紋圓臨風舉酒吸清  
影乃知人世別有天分無仙骨難久住惟有清夢時相牽  
揭來西游真謬算癡蠶自縛亦可憐春光九十過已盡一  
花一草俱無緣得歸茅屋願亦足此身敢望棲林泉羨君  
家居山水窟百年相對真神仙何時暫脫塵俗累許我來  
賦重游篇

定邊雜感

久知邊地冷仲夏似秋深水絕平和味天遲長養心塞長  
疲駿馬雲擁失歸禽唐漢先賢碣茫茫何處尋

郭步韞湘潭人邵士懷母有獨吟樓詩鈔

詩話步韞年十八歸邵家貧夫歿子年幼舅姑令改  
適以死自矢操井日勤侍奉夜則紡績以供菽水其



貞心苦志皆  
寄之於詩

冰

寒冰雖皎潔那及人心血春風有解時寸心終不裂

老松

得氣孤生碧澗外聳枝欲入層雲端貞心不識風霜厲一  
任朝朝是歲寒

梅花

藐姑仙人謫幾時垂垂自發兩三枝頻邀靜賞送新句那  
許纖塵蒙素姿霽雪長亭鴉去遠寒天小院鶴歸遲春風  
二月多桃李冷蕊疏香知未知

除夕

骨月團圓不可期每逢佳節倍生悲年華荏苒成今古人

事遷流多盛衰塵甑常無餘宿粒空囊惟有苦心詩  
聲聲曙角催殘臘賀歲來朝強自支

斗室

斗室宜安拙幽懷頗自閒溪肥前夜雨簾捲夕陽山  
吹角江城暮巢梁乳燕還無窮清意味寫入竹屏間

病起

病起驚秋至新涼轉自嫌西風吹短鬢黃葉撲疏簾  
久飢冰霜苦何妨歲月淹驅愁愁不去依舊上眉尖

蕭蕭

蕭蕭木葉下園林搖落偏驚抱恨心老去不嫌青鬢改  
愁多翻愛素幃深菊當九日凌霜健蟲避西風隱壁吟  
正是夜來愁伏枕誰家月下擊清砧

貧居

春風亭榭四徘徊滿目蕭條院半頽門掩蒼松寒白日雨  
餘幽徑長青苔歲華老我頭將雪時事消人心已灰燕子  
不嫌今冷落年年此日自飛來

送蓮兒往岳

老來倍覺別離難瘦骨龍鍾血淚乾今夜洞庭霜月下扁  
舟回首白雲寒

疏林幾點乳鴉還帆影飛飛夕照間湖上雲峯一十二不  
知何處是君山

秋風

漫道秋風好秋風易白頭空庭黃葉落葉葉是離愁

憶蓮兒

思兒頻倚小樓西極目雲山一望迷記得去年離別處滿  
天風雨暮猿嘯

秋霽

秋霽黯將暝蕭條江上村蟬聲催落木松色老蓬門聚散  
復何定榮枯安足論年年離別淚怕見舊衣痕

元旦

釵荆裙布老深居簾捲機窗試筆初吟罷頻斟新歲酒日  
長細看古人書年華有信春來去時事無憑雲卷舒可笑  
龍鍾還不了只緣詩債未全除

鮑之蘭字畹芳丹徒人皋長女何澧室

詩話畹芳年十四與兄之鐘中秋坐月有句云若非  
今夜月虛度一年秋人稱其慧長益工吟登木末樓  
云天際帆檣沙嶼迴雲中臺殿暮煙輕人不得都中  
書云愁同溪水流難定心似窗蕉卷未舒皆爲時傳

誦

登木末樓有作

狠石千年指舊名  
孫劉霸業若何成  
平原牧馬秋游獵  
古木驚風夜整兵  
天際帆檣沙嶼迴  
雲中臺殿暮煙輕  
微生有幸恣游覽  
木末樓高坐晚晴

久不得都中書

簾帷風暝暮春初  
與古相親與俗疏  
幾帙殘篇塵短榻  
半峯晴翠落衡廬  
愁同溪水流難定  
心似窗蕉卷未舒  
沙鳥羣飛空惹恨  
何時釣得錦鱗魚

鮑之蕙字仲奴號茝香丹徒人舉次女運判張翊室有

清娛閣合藁

詩話洪北江謂茵香詩如栽花隙地補種桑麻王夢樓評其詩云骨重神清情深意鍊其詠晚煙詠柳絮

諸作俱有佳句袁簡齋法梧門咸稱之

### 揚州湖上遲月

試鐙風細夜潮平曲岸維舟待月生垂柳和煙欹水影亂  
鴉如雨入林聲山橋客散車塵定畫舫鐙紅鼓吹清卻憶  
板輿花裏過湖光應識舊時情

乙巳秋侍先慈都門歸經此

### 清娛閣晚眺懷佩芳妹

空階微雨過高閣銷煩暑虹影駕長橋崩雲亂煙嶼蛙蛙  
閣閣喧歸鳥啾啾語徘徊動遠情尺素經年阻憶昔垂髫  
時深閨日爲侶欣看案上書倦織窗間杼細字寫紅蕉新  
詞題白苧星霜催鬢髮聚散消時序悵望竟何如落霞際  
沙渚

### 晚煙

夕陽纔下遠峯巔漠漠平蕪起暮煙度水一痕疏復密隨  
風千縷斷還連花間雜霧迷歸鳥柳外和雲鎖客船最是  
滄江收釣處溟濛無際晚晴天

鮑之芬字佩芳一字浣雲丹徒人皋三女知縣徐彬室

詩話浣雲慧過於姊嘗  
賦簾鉤四律膾炙人口

### 秋夜聞笛

風薄湘簾露氣侵碧雲滿地散桐陰高樓倚月誰家笛客  
館驚秋此夜心塞雁清音應共聽江梅舊韻不堪尋中宵  
引領渾無寐況有蕭蕭萬井砧

### 簾鉤

眉痕掩映霧綃空曳影拋煙近綺叢一角斜牽犀劃水半  
規疑墮月留弓莫驚魚鑰傷春後鎮鎖蝦鬚病酒中誰見

杏花欄檻裏徘徊欲上怯東風

分明擘破玉連環釵股還敲玳瑁彎有意參差邀半面無  
心舒卷任雙鬟空閨似擲流黃速隔院頻窺屈戌閒不鎖  
芳春偏鎖恨一聲驚恐隔蓬山

雷氏邵陽人諸生史繼魯室有彌清閣集

詩話雷氏涉獵書史善入分書能詩  
晚年謂此非婦人事遂焚棄其稿

雁字

薰風無奈祝融火寒雁一聲天地清不羨上林傳漢信羨  
他筆筆寫孤貞

元宵哭夫

去年燈火共元宵爲我窗前拂翠翹佳節依然人不見一  
輪明月冷迢迢



李學溫字蘭貞小名紺珠任邱人中簡長女同縣拔貢

香河教諭舒其紱繼室有麗景樓詩

詩話蘭貞幼讀諸書能通其大義為詩文婉約成體  
又好為小詞事親孝以無胞兄弟故其教諸妹如兄  
歸舒後有賢名多病自知不壽數壻置媵壻弗許  
嘗夢游郊野得句云三年草樹認孤墳醒而惡之父  
妾生子殤蘭貞痛甚謂壻曰聞釋氏有再生之說信  
然吾願得早死重為吾父兒矣未幾竟卒年二十九  
距夢吟恰

三年也

濟南學署秋日歸甯夫子字問歸期敬答十二韻時

午季

高城秋色深瑟瑟寒颺至侵曉倚南樓青天來雁字節序  
過授衣黃菊驚離思展矣懷君子卓犖才未易昨日拆緘  
封宛轉深情致上言秋雨多窗蘭向憔悴下問歸來期循  
諷潛制淚人事多乖舛關山隔迢遰雖無帷車來空愧寶

釵寄欲行還躑躅暮野憂魑魅時東郡有逆匪之變長吟感蕭颯浩  
歎悲陰曠眺望連日夕反側不能寐轉蓬離本根飛揚滿  
天地岡松與澗石歲晚同心契

春水

春光何處好溪水綠煙生蘸柳偏多態浮花最有情泥融  
知燕喜風靜覺鷗輕爲問桃源路漁舟小渚橫

落葉

西風方勁葉黃時寒影蕭蕭作意吹曉月不遮碁響院晚  
煙猶戀鵲巢枝忽驚似雨敲窗急惟愛如花掃徑遲剩有  
幽窗小橫幅春林無恙碧參差

春景

竹亭春草綠小雨引花香燕子來何處銜泥鎮日忙

秋蛩

晚風淅淅雁流初促織微吟在壁隅碎翦秋聲無覓處淡  
煙橫草露如珠

李學慎字以漪任邱人中簡次女滄州左善洵室

詩話文園學士諸女皆能吟詠而長次尤著顧昭華  
女士題十美圖爲時傳誦蘭貞以漪繼作論者謂北  
地才媛足與南國抗手

題十美圖

雕弓金羽學男兒十載從戎百戰歸錯認昭陽陪幸者輦  
前一笑墮雙飛

蕉簟清涼珊枕明涼侵玉骨醉初醒綠雲一朵西風裏低  
襯仙裙上畫屏

絕世天姿出自然碧苔階畔曉風前相看似欲盈盈下石

上三生證夙緣

將飛未舉態嬋娟誰識瑤臺自在仙見說漢皋虛解佩流  
風回首悵長川

金屋羣推絕代名淡妝臨鏡轉亭亭化身卻入丹青裏莫  
訝蛾眉鬪尹邢

自從辭輦掩長門舊事淒涼不可論團扇曾牽懷袖影幾  
回相對憶君恩

漢宮明月照邊關馬上嗁紅去不還非是琵琶解愁思王  
顏容易到天山

東觀書成帝用嘉能將事業洗鉛華閨中韻事從頭數幾  
箇名姝號大家

輕盈無迹踏青塵十二金釵一可人玉笛聲中金谷晚誰

將小幅爲傳神

霓裳妙舞對花叢一曲山香扇底風可是羊家張靜婉小  
垂手態似驚鴻

劉氏鹿邑人州同張坦室有拾燼集

憚珍浦曰劉氏以賢孝稱於鄉里臨歿執詩冊投諸  
火曰婦人之分專司中饋留此何爲其孫淑急撲取  
之大半灰燼僅餘  
一帙故名拾燼

西樓野望

一片清秋色西村八九家漁人歸去晚沽酒入蘆花

金順字德人烏程人汪曾裕室有傳書樓橐

詩話德人自幼能詩兼善寫生年十九歸汪二十七  
夫亡逾年遭姑喪舅年亦遭遺孤甫六歲族人覬  
覷其產者謀害其孤德人乃肩之樓上去其梯每飲  
食必先嘗而後與之始得免害病中感賦云龍泉趨  
死易虎尾  
立孤難

秋夜有懷姊氏

空聞聞落葉天地入秋深况乃中宵雨因之遠別心漏長  
孤夢杳江闊短書沈忽聽南征雁離羣感自今

送南州姑氏回清溪

亦知非遠別轉覺送君難把盞心先醉留題墨未乾夢應  
勞寤寐書望報平安直爲憐多病臨歧苦勸餐

題管夫人畫竹

墨妙由來數仲姬閨房靜對寫風枝王孫若解凌霜節合  
署鷗波老畫師

杭温如字玉輝長安人典史崇德女徐枚室有息存室

吟橐

繳奩

紈綺營身物簪珥飭容具兒身無所託紈綺安所附兒容  
不復修簪珥何所顧空餘此妝奩衣笥間藏注飲泣奉高  
堂留充嫁與娶姑聞亦心傷涕泣零如雨含淚勸姑前兒  
命安所遇從今不出闈釵荆與裙布

自傷

木凋花易謝凋謝各有時胡爲凋與謝非時獨當之十三  
學刺紉十五學吟詩十七長成身深閨人未知忽聞父母  
命許字他家兒十九出繡閣掩泣父母辭登堂拜姑舅婦  
道始從茲妾本無所能妾又何所奇姑舅同歡悅明珠掌  
上持殷情勸阿郎讀書勿自欺懷安名實敗奮志鳳凰池  
那知天奪算一蹶不可醫十九廿一二勞燕各分離舅亦  
尋年歿賴姑歲月遲妾無奉姑孝姑常爲妾慈一朝姑不

顧賸此惻獨姿吁嗟乎妾死姑可在姑死妾何資不然相  
繼死姑婦常相隨竊比木與花凋謝此其期一何留妾身  
受此無窮悲

陳結璘字寶月號修蘭常熟人同縣舉人瞿元錫室有

峻喜堂集藕花莊集

詩話修蘭爲忠宣子婦歸伯申後仇儷唱和抒發性情壹以忠孝爲本旁及繪事力追宋元出入四大家  
一一亂眞王煙客  
太常爲序其集

田家秋興

秋日郊墟喜漸涼稻花阡陌散晴香爭梨鳥雀喧斜日踏  
藕兒童鬧晚塘老樹傍門常掃葉好山當戶故低牆悠然  
獨坐南窗下早挂清芬白苧裳

晚晴謄詩匯卷一百八十四終